

መሕበር ጸመይም ኤረትሮፖ: 5^ይ እጅጉምቡ ሰርገለ

መሕበር ጸመይም ኤረትሮፖ: “ህግ እብ እሻረት፡ መርከዝ ተጠውር ጸመይም” እብላ ትብል ሰቅራት፡ እት ዮም 8 ነሐሴ ዲብ አስመሪ 5ይ-እጅጉምቡ ወደ።

ዲብላ ውዳሪ እብ ለብኡቶም ሰብ-ሰልጠት ሕክ-መት ወጀብሆት፡ ክምሰልሁ-መ ምን አቃሊም ለትወከለው አንፋር መሕበር ለሐድረው ዲብ እጅጉምቡ፡ መሰሉል መሕበር አሰይድ ወልደሚካኤል ሰኢሌ ዲብ አስመዐየ ከሊመት፡ መሻክል ምስክነ ጸመይም ምን መትብሃሃል ዲብ ደሪስ ወአድረሶት እንዲህ ሐልፈ. እብ ዛህር ልትርኤ ሰበት ህላ፡ እሊ ውብዕድ መታክል እግል ልርሄ እብ ሕበር ክድመት ክም ለአትሐዜ እንዲህ ሐበረ፡ አማሕበርት እግል ደማነት ለበ ዐቦት ወተጠውር ህግ እብ እሻረት መትፈራር ለአለትናይት ክምሰልቱ አብርሀ።

ዲብ ውዳሪት ዐመል ወመንገፍ እጅጉምቡ ምዲር ዓም ቅሰም መንገፍ እጅጉምቡ አሰይድ



ምሕረትአብ ፍሰሃይ እብ ተረቱ፡ ጸመይም ክመ ብዕዳም ምሰል ምስክነ ለኩብር መዋጥኒን ለትመሳወ አብክት ለረክቦ እብ መጃል እግል ልዋፋሕ፡ ሕክ-መት አውለውየት እንዲህ ሀብቱ ምንላ ትክድም ዲብ ለህሉት ዋራታት መንገፍ እጅጉምቡ ክምቱ አክደ።

ዲብላ መናሰበት፡ መሕበር ወጠን ምሕርበት ምስኩናም ሐርብ፡ መሕበር ወጠን ሕጃባም፡ ክምሰልሁ-መ መሕበር ወጠን ምስኩናም ዐቅል ወዐቦት ገርብ።



ናይ ምስክነት ልእክት ቀደመው። ለመሕበር ምን ራብዓይ አሰክ ሐምሳይ እጅጉምቡ ለወደዩ ወራታት እብላ ከሰሰ ዲብላ ትቀደመ ተቃሪር፡ ሕቁቅ ጸመይም እግል ልትአክድ፡ መናበራቶም ወፊፍቦቶም አትሐያሱ፡ ጠወርት ህግ እብ እሻረት፡ አብክት ምህር አውሰቦት፡ ክምሰልሁ-መ ፈሀም

መጅተማዕ ወቀሉት ለክምከመ ሽቅል ሰኢ ክም ትሸቀ ተሐበረ።

መሻርከት ዲብላ ተቃሪር ወደሰቱር መሕበር ሐቀለ ናቀሸው፡ ዲብላ መጽእ አርባዕ ሰነድ ክድመት ለተሀይብ ሐዳሰ መመቅርሐይት ጀህት ሐረው።

ዲብ ደንጎብ፡ እብ አንፋር መሕበር ለትዳለ ዕፌ ብሰር እደይ፡ ምህዞ ወሰናዐት፡ ዕፌ ሰወር፡ ክምሰልሁ-መ ሰሰዒት ትቀደመ። እት ሰነድ 1998 ለትአሰሰ መሕበር ጸመይም ኤረትሮፖ፡ እብ ደረጀት ወጠን 40% አንሳት ለብኡቶም ሐድ 30 አልፍ አንፋር ቡ።

ዲብ አፍዐበት ወነቅፈ፡ ወዚረት ተዕሊም ዝያረት ሽቅል ትወዳ

ወዚረት ተዕሊም ዶክተረት ሐሊመ መሐመድ፡ ምን ዮም 3 አሰክ ዮም 7 ነሐሴ እት አቅሊም ቅብለት በሐር ቀየሕ - ምዴርያት አፍዐበት ወነቅፈ ዝያረት-ሽቅል ወዳት።

ወዚረት ሐሊመ ዲብ ወዳተ ዝያረት፡ ምሰል ሓለት ሰብክ-ሰግም እብላ ገይሰ ፍንቱይ ግም ከደማት ምህር ለልሀይብ መዳርስ አሰቃቅ፡ ደባዲብ ወቀርት-ቀየሕ እንዲህ በጽሐት፡ መትቀዳም ወራታት ደሪስ ወአድረሶት ጋንሐት ወእተ

ክምሰልሁ-መ ምሰል ሽዑብ ወእዳራት ሀድገት።

ዲብ ጀውለት፡ መሰሉል ፈሬዕ ተዕሊም አቅሊም ቅብለት በሐር ቀየሕ እሰታዝ ረሺድ መሐመድ-ዐሰማን ወምዲር ምዴርያት አፍዐበት አሰይድ አሕመድ መሐመድንር ረጀብ፡ ሓድረት ሓለት ምህር ወለልትርኤ መሓግዝ ወመታክል ለክሰሰ መብርሂ ሀበው።

እምበል እሊ፡ ወዚረት ሐሊመ፡ ዲብላ ምዴርያት ዲብ ወራታት ብንዩት ለህላዩ መዳርስ ዲብላ



ጋንሐት ዲብ፡ ለሽቅል እግል ልትሻፈግ ምሰል ለትከሰም ጀሃት ሀድገት።

ዲብ ምዴርያት አፍዐበት፡ ዝያድ 17 አልፍ ዲብ ግም ድራሰት ለህላዩ አዋልድ አንሳት ለብኡቶም ዝያድ 25 አልፍ ደረሳይ ህለው።

ወዚረት ሐሊመ መሐመድ፡ ዲብ ምዴርያት ነቅፈ ዲብላ ወዳተ እሊ ለትሸብህ ጀውለት፡ ሓለት መዳርስ ቦርዲን ጸብረ፡ አሰመድ ወቅናረባ እንዲህ በጽሐት፡ ሓለትን ርኤት ወመብርሂ ተሀየቦየ።

ጋሽ- በርኩ፡ ሰብ ምህነት ሐርስ ሐረሰቶት መክሮ

ዲብ አቅሊም ጋሽ-በርኩ ከሻፈት ወመትደንጋር ዝላም ዲብ ሳድፍ እቱ ወክድ፡ ሐረሰቶት ጀሐር ለልክህል፡ ወአጊድ ለለአቱ ዘርእ ወጃብ እግል ልዝረኦ ወደለ ትረከበት ዝላም ዲብ መዓል እግል ለአውዕሎ ለሰዳ አብሳር እግል ልልመዶ ሰብ ምህነት ሐርስ መክረው።

መዲር ዓም ቅሰም ሐርስ ወአርድ አሰይድ አብብከር ዐሰማን እግል ኤሪን እተ ሀቦዩ ሐብሬ፡ ዲብላ በዝሕ ድዋራት አቅሊም ጋሽ-በርኩ ዝላም እንዲህ አደገት ክም አንበተት፡ እብ መትመዳድ ወቅያሰመ ክመ እሊ ትሰኤት ሰበት ኢኮን፡ ዲብ ርሕብለ ልትሐርስ አርድ ወደረጀት ዐቦት ዘርእ መሻክል ክም ሰበበት

እንዲህ ሐበረ፡ ሐረሰቶት ለእሊ ረክቦ ዝላም ዲብ መዓል እግል ትውዕል፡ ግርህም እብ ዋጅብ እግል ልካርሮ ወለአጥፍሖ፡ ወለ ሓለት ለልክህል

ዘርእ ወጃብ እግል ልትነፍያ መክረ።

እት ናይ ዮም ዓመት ከረም እብ ደረጀት አቅሊም ሐድ 291



አልፍ ሄክታር እግል ልትሐረስ በራምጅ ምንመ ዐላ፡ እብ ሰብሰ ሕዳን ወአደገት ዝላም አሰክ እሊ 76 ምእታይት ሌጠ ክም ተሐረስ ለሐበረ መሰሉል ፈርዕ ዐማር ብቅል፡ አሰይድ ነጋሲ ሀብቱሚካኤል፡ ሐረሰቶት ኢመትሳዋይ ወሕዳን ዝላም ዲብ ሕሳብ እንዲህ አተው፡ ትራክተራት እንዲህ ኢልታከው እበ እሉ ቦም እግል ልሕረሱ፡ ግርህም እብ ዋጅብ እንዲህ አሸፍረው ለእሉ ረክቦ ማይ ዲብ መዓል እግል ልአውዕሎ እግል ልክደሞ አትፋቀደ።

ለሰብ ምህነት ሐርስ ዲብ ደንጎብ፡ ወራታት ሕፍዘት ማይ ወትርበት፡

እብ ዓመት አዳላይ አርድ ሐርስ ህይ እብ ፍንቱት ምን እብ ሕሰር እግል ልትከደም እቱ ለወጅብ አብሳር ምንማ ቱ፡ ዲብ አቅሊም ጋሽ-በርኩ ክመ ልትሐዜ ክም ኢጌሱ፡ እብ ሰበቡ ህይ፡ ሐረሰቶት ምን መታካይ ዝላም ከረም እግል ልፍገሮ ክም ኢቀድረው እንዲህ ሐበረው፡ ወራታት ሕፍዘት ማይ ወትርበት እግል ልትሸቀ እቱ ወምድር ዲብ ወክዱ እግል ልትሸዐግ ሕዳን ዝላም እተ ሳድፍ እቱ ወክድ ለትረከበ ማይ ዲብ መዓል ለለአውዕል አብሳር እብ እግል ልሸቀው ወግማት ወምክር ሰብ ምህነት እግል ልታለው ተሐሰበው።

ቀጠር፡ ጃልየት ኤርትራዊን 10^ይ ሙእተመር ሰርገለው

ጃልየት ኤርትራዊን ሰነን ቀጠር፡ “እብ ሕበር አስክ በርሀት ፈጅር ነአሴርር” እብ ትብል ሰቅራት፡ እት የም 31 ጃላይ ዲብ አደውሓ 10ይ ሙእተመር ሰርገለት።

ዲብ ብዝሐም አንፋር ጃልየት ለሐድረው እቱ ሙእተመር፡ ሰፊር ኤርትራዊ ዲብ ቀጠር አሰይድ ዐሊ እብራሂም እተ አስመዐየ ከሊመት፡ ዶር ጃልየት ዲብ በራምጅ ወጠን እንዴ ሐመድ፡ ፍንጌ አንፋር ለልትርኤ መትሳዳይ ወሕስን፡ ውሕደቶም እብ ለሐሰ ለለአተርድ ወእግል መንፈዐቶም ለከድም



ሰበት ቱ፡ እብ ለሐሰት ገበይ እግል ልክደሞ እቱ አትፋቀደ።

መሻርከት፡ እት ሽቅል ለጸንሐት መመቅርሐይት ጀህት ጃልየት



ዲብሊ ቀደመቱ ተቃሪ ሽቅል ሐቀለ ሀድገው ወናቀሸው፡ ዶር

ጃልየት እግል ልትወቀል ለአመመ ናይለ መጽእ በራምጅ ትፋህመው።

ዲብ ደንገበ ሙእተምሪን፡ ሐዳስ መመቅርሐይት ጀህት ሐረው።

ሰፊር ዐሊ እብራሂም ዲብ ሐላፊየ ከሊመት ካቲመ፡ ሙእተምሪን ለአርአወ መሻርከት ወፈዛዐት እተ ዲብ ለሐምድ፡ ሐዳስ ለተሐራት መመቅርሐይት ጀህት፡ ውሕደት ወመዓወነት አንፋር ጃልየት እግል ለአደብ፡ ክምሰሁመ ዲብ በራምጅ ወጠን ዶርም እግል ልወቅሎ እብ ክለ ሐላቶም እግል ልሸቀው መክረ።

ሰንዐ፡ ዲብ ልጃን ዕሬ ለሸቁ መሓደራት ተህየበት



ዲብ ምዴርየት ሰንዐ፡ ዲብ መጅተማዕ ለልትርኤ አከይ-መፋህማት እብ ዕሬ ለልአስክዐ ልጃን፡ ዲብ አምሳይ ወራታቶም ለትሰድዮም መሓደራት እት የም 5 አገሰት ነሰአው።

ሀደፍ ናይ እለ እግለ እት 23 ዳሕየት ለሸቁ ልጃን ዕሬ ለትህየበት መሓደራት፡ ለትጀሬ ኢመፋህመት ዲብ ሰዋልፍ መጅተማዕ እንዴ ትወለበብክ እብ ዕሬ ለትሰክብ እብ አግቡይ፡ ሰብ-ጋሪት ህይ ምን በደ ወቅት ወማል እንዴ ነግፈው ቅደዮም ምን ቅሩብ ሐል ለረክብ እብ መጃል እግል አጥፈሐት፡ቴ።

ለመሓደራት ለሀበ ምን መርከዝ ፖሊስ ምዴርየት ሰንዐ፡ አሰይድ ኤርምያስ ሐድገ፡ ልጃን ዕሬት መደንያይ ወናይ ጀሪመት ቅደይ እብ ዋጅብ እንዴ አሌለዉ በንበን ጸቢጡ እግል ልተብዖ ወአሰሉል ፈሀም ራቴዕ እግል ልወቅሎ እት ልትፋኔ፡ ፍንጌ ሕክም ወዕሬ ለህለ ፈርግ እንዴ አመረው፡ ከደማት ሳሬ እግል ለሀበ እብ ነሳሐት እግል ልክደሞ አተንበሀ።

መስኡል ዳፍየት ጀራይም ኮርፖራሌ አቶብርሃን ሀይሌ እብ ጀሀቱ፡ ፍንጌ አንፋር ለልትከለቅ በአስ ወመክሐደ እብ ልጃን-ዕሬት ሐል እግል ልርከብ፡ ዶር



ልጃን ዕሬት ምህም ሰበት ቱ፡ ለመሓደራት ዲብ እሊ መጃል እሊ ሐዘተ ውቅል ክምተ ሸርሐ።

ቃይድ መርከዝ ፖሊስ ምዴርየት ሰንዐ፡ ናይብ ተሌንቱ ክፍሌ ተሰፋዮውሃንሰ ህይ፡ ዕሬ እግል ኩሉ ጀሃት ለረይቱ፡ ሐል-ዳይም ለለአመጽእ፡ ክምሰልሁመ በአስ

እንዴ ባልሐ ሕሰን ወውሕደት ለለአደምን፡ ምንለ ለንትሐበን እብ ወእግል ለአተላሌ እብ ለትወቀለ እግል ንክደም እቱ ለወጅበን ሰዋልፍ ክምሰልቱ ሐበረ።

መሻርከት እብ እንክሮም፡ ለመሓደራት ገበይ ጽብጠት ቅደይ ወዶር ዕሬ ዲብ ለጸንሐ እግሎም

ፈሀም መርበይ ለተአጽብዋ ወተጃርብ ለትወቅል ሰበት ቱ፡ እግል ተአተላሌ ትፋነው።

ዲብ ምዴርየት ሰንዐ፡ ለህለየ 23 ዳሕየት፡ እብ ዓመት 490 ልጃን-ዕሬት እንዴ ተሐረው ወራታቶም ዲብ አታማም ሸቁ ህለው።

ምግብ፡ ፈሬዕ ቃኑን ወንዛም ኪደት ቀዋኒን ወመምሬሕ እግል ክርዐት መራቀብት ወዴ

ፈሬዕ ቃኑን ወንዛም አቅሊም ምግብ፡ ኪደት ቀዋኒን ወመምሬሕ እግል ልትክረዕ፡ ምን ሰልፋይም 6 ወሬሕ ትሩድ ንዛም መራቀብት ክም ወደ ትሸርሐ።

ናይ ዶሉ መስኡል ፈሬዕ ኢንሰፔክተር አርአያ ዳኘው እግል ኤሪና ዲብ ሀበየ ሐብረ፡ ምን ጃንዋሪ አስክ ጃን 2026፡ ዲብ በረ ምን ቃኑን ላተ ትጃረት፡ ለፈሰደት ብዳዐት፡ ዐዳገ ወዐውል፡ ክምሰልሁመ በረ ምን ቃኑን ለልትበኔ አብያት እቱ እበ ገአ መራቀባት፡ ነቃስ ለትረከበ ዲብን መአሰሳት ሸክወት እንዴ ትቀደመት ዲብን፡ እብ ዓመት ሐድ ሰማን-ሚልዮን ነቅፈ ቀራመት ክም ገብአት እተን አብርሀ።

እምበል እሊመ፡ ሰማሕ ትጃረት ለየአጀደደየ ወምን ሰሞሕ ወክደን ወለዐል ዲብ ሽቅል ለጸንሐየ መአሰሳት ባኒ፡ ክምሰልሁመ እምበል አሰሳብ ወሱክ ዐውል



ለወደየ መአሰሳት ፈርሸት እክል፡ ከዋዋት ደብእ ወቀራመት ትነሰእ ዲብን።

ኢንሰፔክተር አርአያ እንዴ አትሉ፡ እት ሰነት 2002 ለፈግረ አዋጅ መኔዕ-ፊሰታል፡ ምንለ መታብዐት ትርድት ለገብእ ዲብ ክምሰልቱ እት ለአክድ፡ ዲብ ሐልፈው 6 ወሬሕ ፈሰታል ዳብጣት ለትረከበየ 40 መአሰሰት ወነቃስ ለትረከበ ዲብን

15 መአሰሰት ዝቤ ሰገ ቅራመት-ማል ክም ገብአት እተን ሸርሐ።

ዲብ ደንገበ፡ ብቅት ነድ እበ ክሰስ እተ ሀበየ ሐብረ፡ ዲብ አወላይ ሰር ሰነት እባ ጀረ 54 ነድ እሳት 3 ነፈር መይቶ ዲብ ህለው፡ ሐምስ መናድድ ክም ጀረ ዲብም፡ ወዲብ ዐፍሸመ ዝያድ 35 ሚልዮን ነቅፈ ለትትዋገም ደማር ክም ጀሬት አክደ።

እፈትርየዐጃላስ

ክል አርቡዕ ለትጠ'በዕ ጀሪደት

መዳልያይ፡-

- መሐመድ እድሰ

ለይአውት ወአርተዖት

* ዘህረ ዐሊ

* ፋዋን አድም

ተለፎን፡ 121797/201820 (258)

ፋክስ፡127749፡ ዕ.ሰ.ቡ፡ 247

ተውዝዕ ጀሪደት፡

ተለፎን፡163471-07588045

አትአመሮት፡

ተለፎን፡ 125013፡ ዕ.ሰ.ቡ፡ 1284

ሰንዐፌ! ፍቀዲቶ ማሌ ወወማርድም!

4^ኛ ክፋል

እት ሰነት 1999 ለወሬሕ ብዙሕ ደጸፈቅዱ፤ እብ ጀብህት ሽዑብየት ቅስም ዓዳት ወተዕቢኣት ለመጸእ ሺድዮ እት ሲነመት ዛለምበሰ ማጽእ ዐለ ክክሉ ከፈፍል ጄሽ እብ ጀህት ጀህቱ ሐቆ ሳዐት ሰማን እት መዲነት ዛልኣንበሰ ትጃመዐነ። ሺድዮ እግል ለአስተብዔ ሐቆ መትዐድያይት ሕላየት ወድ ሼክ በጽሐ፡ ክሉ ክምሰል ንህብ እት ለዐጅጅ፡ ልጅብሃት እብ ዝላም ሰኒ ሃድእ ወራይግ ሰበት ዐለ ለዐጂጃ ኣዳም ወለ ባናህ ሲነመት እት ደብር ፋጺ ተሰምዐ፡ መብሽር ለክፍ መዳፊዕ አስተብደየ።

ኣነ ምስል ሽሂድ ሓምድ መሐመድ ወድ ኣፍዐበቹ ወሽሂድ ዑስማን እስታቅፍሪላህ ወመሐመድዐሊ እድሪስ (ጅብጅብ) እት ንትሃጀክ ክል ምሮት ከእግሩ ለቀንጸት እበ ቀንጽን። ላለአትፈክር ሰልአስ ዶል ለክፈው ወምን ክሉ እሊ ኣዳም ለእተ ጋድም ብሩር ለዐለ በርደን ወሰላመ እንዴ ገብእ እብ ሰላመትነ አስክ ድፊዐነ አቅበልን።



ከእብለ መናሰበት እለ ክሉ እሊ እት ድፊዕ ዛልኣንበሰ ለዐለ መሐርባይ ለፈቅደ ፍንቲት ሕላይት ተ።

ክእላመ ምስል እትሳል (ጅብጅብ) ክምሰል ካልኣይት መፋጀኣት ትርኢተኒ። እግላመ ምስልዬ ዐለው ኣንፋር ደገምቲህ እግሎም። ወምሰዐል ክሉ ህዬ፡ ዝክሪያቹ ሀረሰት።

እለ እዲነ ረቢ ካርዐ ልግበእ! ተዋልለ ብዙሕ ቱ!። ኣዳም ክሉ ሰሰዐ ወበረጀ፡ ፋጸ ወፈዋፊጠ። ኣነ ላኪን እት ቁሪነ ምሒጣት ሰርቤብ ወሰፈላል ክምሰል እተምስ እት ፍንቲይ ዝክሪያት ተሸምም። ለሐፍለት እት ተኣተላሌ ወሐልየት ሴዕ ቆሚየት ሐቱ ከአሰር ሐቱ እት ተኣተርቱ ለዶር ኣዜመ እት ሕላየት ወድ ሼክ (ሐየት እንተ ምን በዲር) ለትብል በጸሐ። እንጅኔር ዐንዳት ለዋ እበ እዳዬ አበሊኒ ወሰልፍ ኣዳም ገርብን እግል ንፋሰስ አስተብዴን። ክሉ ክምሰል ሐዘ እት ልትህላበእ ኣነ ክምሰለ ገመል ለቅደድ፡ ገርብዬ ጹቡዋ ምንዬ እት

እንቱ (ከሸ) ክምሰል ኣዳምዬ እቤ።

ኣዜመ ሐቆህ ሕላየት እግል ፈጊር እስእንዬ ዋጪልኩ፡ ወምነ ዳስ በረ ፈገርኩ ወእግለ ሞዳይ ለምን ረአየቱ ክልኤ ዕንቹ ጸጊብ አበዩ፡ ኬን ወእንሰር አትቃመትተህ። ኣክለ ዐፊኩህ ክለ ሰኒን ረዩም እት እንቱ ዮም ወማሌ መስለ እቹ። ኣስክ እለ ላኪን ለመሳክብን ባጽሓመ ይህሌን፡ ፡ ምን ረዩምቱ አትናውሩ ለዐልኩ።

እተ ወድ ኣንበሰተ-ገለበ እንዴ አቅበልኩ እብ ወድ ፈሲለቹ ለዐለ ሽሂድ ጸጋይ ደሰተ እብ ዋልዴት ወሐቱ ገብርኤል ደሰተ እት መዲነት ነቅፈ ለተአመርኩ ምስለ ወእት ኣምዕል መዐረከት 03/06/1998 ብጣቀቹ ዋድቀት እት እንተ ወያኔ ምንዲ ረክበወ ነሰአተ ምናም ወእሊ ወድ ነቅፋቱ ቴሎም። እት ደንገበ ህዬ ምስል ሐህ ሽሂድ ጸጋይ ደሰተ መጸአተኒ። እት ዕለት 25/05/2000 ምስል ሓምድ ቀይሕ እት ፎርቶ ሰርሐ አስተሸህደ።

ኣብረህለይ እት ሰአልዬ እት በልሰ “ መዐልም እንተ ማሸኣህህ ዛክረትክ ሰኔት ህሌት ጸጋይ

እስትሸሃዱ ምስልክ ሰበት ዐለ ኣምሩ ህሌኩ፡ ላመ መርዓቱ ወላድ የሐድገ እተ። ገብርኤል ደሰተ እት አዲስ አበባ ትወፊት። አቡክ ደሰተ ግድም ረአይ ወሰመዕ በዋረ ምናም በዐል ቤት ገብአው። ለእሲት ደሰተ ሚ ጋረተ እተ ባክ ሸፍረ ትቀንጽ ወትትገሌ እት ገለበ ህሌት” ቤሊኒ።

ኣነ ለተዋልል ለትደገመ እግልዬ ሰኒ ኣግሁዬ እት እንቱ “መስኪነት ዓይለት አቡዬመ ደሰተ ወገህ ገብአት ወገህ ጋብአት ትግበእ!” እብሉ። ክለ ለእግለ ትርኤ ወትሰሚዕ ከምነ መልሀየ ትትመክረህ እትከ። ኣዜም ለሐይሰኒ እቤ መሰለኒ ኣስክለ ሐፍለት ተምም ኣነ ኣስክለ መኪነትነ ተበዋር እተ ለዐለት ኣካን እንዴ ጊሰኩ፡ እተ ግራህ ተገሰኩ።

ምን እሊ እቱ ሐምስ ወእተምስ ለዐልኩ ሽዑር ማሌ ወለፍራስ መታሊቹ እግል ዶሉ እትሊ ለኣዜ ለህሌኩ እቱ ተዋልል እግል እግበእ። ምስል አርወሐቹ ትጋሚኩ።

ክምእኒ ህዬ እቤ! “ተፍሪረቹ

ማሌ እግል ዴቅቢት ሲደደት ምስለ ሕጌ ወገለብ እት ገብኦ እግል እለ ቃልየት ትርብቶም ምን ተዐሊ፡ ሐበን ወሕሸመት ተ!! እብ እስትሸሃዶም ንተሐበን፡ ወእብ መትሓካሮም እንሸንን ወእንገንድል ለተእሪኩም እት ኣልባብን ለሓጌ ወለኣልሐቱ፡ ለኣከርም ወለኣቀይም፡ ወኢበሌ ወኢፈኔ አስክ ክሉ እሊ ኣግማም ለኣተላሌ ህለ” እቤ።

ክምሰለ እት ሰልፍ ክቱብዬ ደገምቲህ እት ግርበት ሰነት 2025 ወእት ሄለል እለ እተ ህሌነ ሰነት 2026 ቱ ኣስክ አቅሊም ግብለት እግል አስነዮት ኣግቡይ ወእብ ፍንቲይ ገበይ አስመረ ሰርሐ ኣሌፍ እንዴ እንቤ ለአስተብዴን። እብ ፍንቲይ ህዬ ምን ዐዲ ቀይሕ ወኪን ለገበይ አሰረ እግል ኢተአብዴ እፍርህት ተ ለዐለት።

ሰነን ምዴሪየት ሰንዐፊ፡ ወመዲር ምዴርየቶም አሰይድ እድሪስ ዐሊ ሸከር ላሊ ወኣምዕል መዋ-መጦርን ትሳሰዐው። “ሚ ነቅሰት ወሚ ተርፈት?” እት ልብሎ ወእግል ሸቁልነ ኣግቡይ እት ለኣትራትዮ፡ ምስለ ውቁል መዐነቶም፡ እግልናመ ሴፈ ወመስተይ ወሰአየት ገብአው እግልን። ክምሰለ ልትአመር ክሉ ገቢልነ መትሐድራይ ወሄይባይ ወዕጹም ምንማቱ፡ “እሊ ዐድ እሊ ላተ ናዩ በናተ ኣስክ እንብል እብ ወቀዮም ወጸጎቶም ንጣፍ ወክባብ ገብአው እግልን።

እብ ፍንቲይ ምን ለጽርግዩ እምባ ታሪክ ኣስክለ መዲነት ክምሰል ሸበት፡ እብ ፈርሐት ለእግለ ሶም እንዴ ኢልምሕት “ብልፆ ሰተው” እት ልብሎ እት ኬዋታት እንዴ ትነዘመው፡ መባዋርም እግል አስነዮት ጽርግዩ ዝያድ ክሉ ወቅት ተወቀሉ። እለ ጽርግዩ እለ ሰንዩተ፡ ለኣከይ ሓል ጋብእ እተ ለዐሊ፡ እንዴ ተሓፈረት ምነ ተልገ ሌህ ተባልሐክ ምንዲ ገብእ እት ካልእ ተልገ እት ትትከሬ፡ እት ረአስ መኪነት እት እንተ ገርብክ ለሐከት እንዴ ፈግረት ምነ ከትትጀዐተት።

ሕናመ ኣክል ፈጅር እት እንቱ ኣሰበሓት ከሐቱመ አመት ቀደም ጊሰነ ምንዲ ገብእ፡ ንዩትነ ተሰኔ ዐለት፡ ወእግለ በዐል ሰአየት ገቢል እንፈሬሕ ዐልነ።

አይወ! እለ ገበይ እለ እግል ክም ወክድ እት ረአስ መኪነት ባኒ፡ ምስል መኪነት ኣሰለሐት፡ እብ እግር እግል ራድኢት ድፈዕ፡ እግል ተድራብ፡ ሄራር እብ እግር፡ ቀደም ዕሰረ ወሐምስ ሰነት እንካይደ ለዐልነ፡ ዮም እግል ኣስነዮተ ወኣትሐደሰተ እንካይደ እት ህሌን፡ ንዩትነ ሰኒ ትፈሰሰት ወደሚርን ቀርደ። ምሰዐል ክሉመ እግልዬ “አሰናይክ” ቤለውኒ መዳግምዬ ወመካይጃ እተ ሸብሃት ለኣምሮ ሰበት ዐለው።

ልተላሌ.....

ሐልሐል፡ እት ዶር መጅተማዕ ዲብ ጠወሮት ከደማት እጅትማዕየት ተህደገ

ዲብ ምዴርየት ሐልሐል፡ ዶር መጅተማዕ ዲብ ጠወሮት ከደማት እጅትማዕየት እግል ልትወቀል ለህድገ እጅትማዕት፡ ምን ዮም 27 ጁላይ ኣስክ ዮም 5 ኣጎስት ገብኡ።

ምዲርለ ምዴርየት አሰይድ



ግርማጽዮን ኣብርህ ምስል ዐባዩ ዐድ ወልጃን ደገጊት ዲብ ወደዩ እጅትምዓት፡ እብ ወክድ ወክዱ ልትዳሌ ለህለ መአሰሳት ከደማት እጅትማዕየት ሸዐብ እብ ዋጅብ እግል ልትነፈዕ እቡ ወኣተላለዮቱ ደማነት እግል ልርከብ ዲበ ሰዴ መጃላት ተህደገ።

ሐዘነ ሰነን ዲብ በራምጅ ዐማር ወደሐን ለሐመደ አሰይድ ግርማጽዮን፡ ፈዓልየት ለልትኤተን በራምጅ እብ ዋጅብ እግል ልታብዩ ወመትነፍዖቶም እግል ልትወቀል ናይ ሕበር ፈሀዋም እግል ልወቅሎ ትፋነዮም።

ሰነን እብ እንክሮም፡ እሊ መስል እጅትምዓት ወህደግ እብ ገበይ ንዝም እግል ልግባእ፡ መርከዝ ዓፍየት መለብሶ ዲብ እስብዳልየት ለልዐቤ ዲቡ ቴሌል እግል ልትከለቅ፡ ክምሰልሁመ ጽርግዩ ከረን-ኣስማዋ አትሳናይ እግል ልግባእ ዲበ ለልብል ወኣራእ ብዕድ ቀደመው።

ግብለት፡ ዐዋዲ ዴራይ ለክሰስ እጅትመዕ ገብኦ

እት አቅሊም ግብለት፡ ዴራይ ለመድ እግል ልሰረት ወሕቁቅ ኣጀኒት እግል ልትኣከድ ለትሰርገለ ወራታት ለጌመመ እጅትማዕ፡ እት ዮም 5 ኣጎስት ዲብ መንደፈረ ገብኡ።

ለምን 12 ምዴርየት



ለትወከለው እንፋር ልጅነት ኣሰረቶት ዐዋዲ-ዴራይ ወካይል ኣፍርዐት ወውዛራት ለሐድረዉ ጌማም-ሰር ሰነት፡ እብ ምዴርያት ለትሰርገለ ወራታት ወለዐለ መታክል ትቀደመ ወትህደገ ዲቡ።

ምዲር ዓም ቅስም ከደማት ጅትማዕየት መምህር ቃልኣብ ተሰፋሰላሌ ዲባ ቀደመዩ ተቃረር፡ ህደፍ ልጅነት ኣሰረቶት ዐዋዲ-ዴራይ፡ ፈሀም ወፈዛዐት መዋዋኒን እንዴ ዜደ፡ ዲብ ኣንሳት ወኣጀኒት ለጀሬ ዐዋዲ ዴራይ እብ ዓመት፡ ክሸቦ ወህዳይ ንእሽ ህዩ እብ ፍንቲይ እግል ልሰረት ክምቱ እት ለሐብር፡ እተ ሐልፈ ሰሰ-ወሬሕ ሐድ 148 ኣልፍ መዋዋን ለሻረከው ዲቡ እጅትምዓት አትፋዝየት ክም ገብኦ ኣብረህ።

ለኣትፋዝየት፡ መሻክል ዐዋዲ ዴራይ እብ መጅብ ዓፍየት ገርብ ወዐቅል ወቃኑን ለከምከመ ክም ዐለ

እንዴ ሸርሐ፡ መጅተማዕ ዑፋያም ወመፍርየት መዋዋኒን እግል ለህሉ እሉ፡ ዐዋዲ ዴራይ እግል ልሰረት ዶሩ እግል ልወቅል አትፋቀደ።

መሻርከት እብ ጀሀቶም፡ ለእጅትማዕ ተጃርብ-ሕድ እግል ልትባደሎ ክምሰልሁመ እግል ለአስምዖ ለቀድሮ ጀሃት መጅተማዕ እንዴ ተ'አመረው አትፋዝየቶም እግል ለኣ'ተርዶ ክም ሰድዮም እንዴ ሐበረው፡ ዐዋዲ-ዴራይ ለለኣጀሩ ጀሃት ምስዳር ተሰዬሕ እግል ትትነሳእ ዲቦም ትፋነው።

ሓክም አቅሊም ግብለት ኣሰይድ ሀብተኣብ ተሰፋጹን ዲበ ቀደመዩ ከሊመት ካቱመ፡ ለመድ ዲብ መደት-ሐጫር እግል ልትረፍ ክም ኢልትሰኤ እት ለሐብር፡ ምን አቅሊም ኣስክ ድጌ ለህለው ኣንፋር ልጅነት ኣሰረቶት ዐዋዲ-ዴራይ ተቅዩር-ጠቢዐት እግል ልሰበቅ እምበል ሕላሌ እግል ልሸቀው እቱ ትፋነ።

መዐርድ አቃሊም መሀረጃን 2026 እብ ብዙሕ ከይራቱ

ሙሰውር፡ ክብርም ጸሀይ

ዮም ዓመት ዲብ መሀረጃን ሰነት 2026 ልትቀደም ለአስመን ጽብጥ ብዙሕተኛ። ምኑ ዲብ ለሐልፊ ናይ መዐርድ ዕፌ ሚ መስል ክም ዐሉ፡ መዐርድ አቃሊም ዐንሰቡ፡ ግብለት በሐር ቀየሕ ወጋሽ-በርክ ቅዱማም እግልኩም ዐልኑ። ዲብ እሊ ናይ ዮም ካልኣይ ወናይ ደንጎበ በርናምጅኑ ህይ መዐርድ ናይ አቃሊም ቅብለት በሐር ቀየሕ፡ ግብለት ወምግብ እንዴ ጸበጥነ ማጸምኩም ህሌኑ። ቅራእት በኪተት።

ኢሳይያስ ተሰፋዝጊ ሰክራቴር ለጅነት መዕረድ አቅሊም ቅብለት በሐር ቀየሕ ቱ። ህቲ ዲብ እሊ መዕረድ ማጸም እቡ ለዐለው ዲብ ሸርሕ፡ ሰልፍ ክሉ ፍንቲይ እህትማም ለልትህየቡ ዲብ በዴ

ግርመት ለለርኤ ኮራል ሰርጉይ ለህላቱ። ሰበት እሊ በሐርን ምስለ ለህለ እሊ አርዛቅ ዝያድ እብ ብዝሐ መክሉቃት ለትሰርጊስ ክምተ ለለርኤ ሰበትቲ፡ እግል መትፈርጀት እብ ፍንቲይ እብ ሕብሩ ወለትፈናተ

ግርመት በሐር እግል መዕረድ ዝያድ ግርመት ምነ ለህበዩ ቱ። እሊ አቅሊም እሊ እብ ከይራቱ እግል ስያሐትመ ዝያድ ለለኣትናይት አቅሊም ክምቲ ለልኣርኤ ሰወር ምነ ጃሳል መዕረድ ናይለ አቅሊም ሃይብ ለዐለ ክምቲ ሕናመ እብ ዕነ እግል ንርኤ ቀደርኩ።

መኮነን ሸዋዩ ዎር ምን ለጅነት መዕረድ አቅሊም ግብለትቲ። እብ ሰበት ዲብ መዕረድ አቅሊም ግብለት ቅዱም ለዐለ ከይራት ተውዲሕ እግል ለህበነ ህይ ስእላሙ ዐለኑ። ህቲ ዮም ዓመት እግል መሀረጃን ለመጽእናቡ ለትፈናተ ነሻጣት ናይለ አቅሊም እቅትሳዲ፡ እጅትማዒ ወቲራሲ ሄራር

ከአፎ ልትሓፈዝ እቲ ወእብ ደረጃት ሕኩመት ወአቅሊም እህትማም እንዴ ተህየበዩ ዲብ ሕፍዘቲ እግል ልትከደም ለለርኤ ቱ። ምስል እሊ ለገይስ ዲብ አቅሊም ግብለት ለህለ ናይ ሐሸራት በህለት ክም ሐናኒት፡ ሳንድፍላይ ወብዕድ ሸዐብ ከአፎ ዳፍዕ ምኑ ለለርኤ ወምን ወክድ ዲብ ወክድ ሸዐብ ከአፎ ዳፍዕ ለልኣደርስቲ።

እምበል እሊ ከደማት ዓፍየት ዲብ አቅሊም ለአርእዩ ለህለ ዐቦት እብ ፍንቲይ መርጅዕየት እስፒዳልየት መንደፈፈ፡ ዲብ እሊ ወክድ እሊ ለህለ እሊ ከደማት አክል አይቲ አስክ ናይ አክሲጅን ከደማት ክም ተህይብ ወእግል ክሉ ለአቅሊም ለልትግጸሕ ተአፈሬ እቲ ክም ህሌት ለወድሕቲ። እሊ እግል አፍረየት ህይ ዲብ መንጠቀት ትኩል ለህለ ናይ ጣቀት ጸሓይ አስክ 250 ኪሎ ዋት እግል ለአፍሬ ለቀድር ሰበት ህላቲ። ምስሉ ሕክምነ ፊሰቲለ ለከሰሰቲ እብ ደረጃት ወጠን አስክ 1500 ለገብአ እብሊ ሕማም እሊ ለደረረዩ ምን ወክድ ዲብ ወክድ ክም ልትሳረየ እቲ ለልኣርኤ ቱ። እሊ እስፒዳልየት እሊ ዲብ ሳዕት አስክ ሐምስ ኩንታል ግማመት ዲብ ጨበል ለበድል መስናዕመ ክም ህለ ዲብ ለአፍህም። ክም ከልፍየት ናይለ መዕረድ ለህለ ሰወር ህይ ናይ ደዕርተት ዲብ ሐምስ ነቅፈ ለህሌትተ። እሊ ህይ ሸዐብ ክም ዳሱ፡ ጽላሉ ወቃዐቲ ናይ ሕክሙ ወእዳረቲ ለልትነፋዕ እበ ዐባይ ጽላሉ ክም ተ፡ ምስሉ እት ኩሉ ምዳርያት ናይለ አቅሊም ገብእ ለህለ ናይ ሕፍዘት ማይ ወትርበት ነሻጣት መ ለልኣርኤ እንዴ ጸብጠው ክም መጽአው አሰይድ መኮነን ወዴሕ።

ዮናስ ገብሩ ሰክራቴር ለጅነት መዕረድ አቅሊም ምግብቲ። ዲብ መሀረጃን 2026 አቅሊም ምግብ ክም መዕረድ ቀድሙ ለዐለ ዝያድ እህትማም እግል ልትህየቡ ዲብ ለወጅብ ሐድ ምነ ብዙሕ ከይራት ናይለ አቅሊም ቱ እግሉ ቅዱማም ዐልነ ልብል። እንዴ አትለ ሰለሰ ዐባዩ ጸበጥ ቅዱማም ህሌኑ ህቲ ህይ ለአወላይ ዲብ ዐማር ገብእ ለህለ ነሻጥ ሐርስ ወዓሉ፡ ለካልኣይ ህይ ከጥ ማይ ዲብ መዲነት አስመረ ለከሰሰ፡ ወለ ሳልሳይ መባኒ ቀዲም ናይ መዲነት አስመራቲ። ሰበት እሊ ዝያድ ተውዲሕ ለልትህየብ ዲብ ናይ ሐርስ ወሸትልቲ።

እሊ ናይ ሸትል ዝያድ 45 ጅንስ ዕጩ ናይ አስል ወሐዲስ እንሸትል ወንትነፋዕ ህሌኑ። ምስል እሊ ለገይስ ናይ ከዛናትቲ እሊ እብ ሸክል ሰወር ሸዐብ ክም ልትኣመር ምስሉ ጋብእ አስመክ። ሐቐ ከዛን ለመጽእ ህይ ናይ ሐርስ ወዓሰ ነሻጣትቲ። እሊ በርናምጅ እሊ እብ ናይ ንኡሽ ወለኣረቤሕ ግረህ ለገብእቲ፡ እግልሚ ምህም ወለበዝሐ ሐርስ ሰበት ወክል። እሊ ህይ ክም ሰልኣሰ በርናምጅ አወላይ ናይ ሸንጊይ፡ ለካልኣይ ናይ ቅርጡጥ ዘርእ 800 መትር



ዮናስ ገብሩ



ሞኮነን ሸዋዩ



ኢሳይያስ አሰፍሰ ተሰፋዝጊ



ገይስ ለህለ ንዋይ ከደን ለለርኤ እብ ሸክል ሞዴል ቅዱማሙ ህሌኑ። ህቲ ህይ ክም አድግ ከደን እብ ደረጃት እዲነ ዲብ በዴ ገይስ ለህለ፡ ዎር ምነ ዝያድ መትፈርጀት ለአምበሰጦ ምኑ ለህለውቲ። ብዕድ ሰገን፡ አራባት፡ እብ ብዝሐ ዲብ አቅሊም ለህለ ከምስልሁ መ ዐንዶለ ለልትበህል ሰራይር ዲብ አዋራፍ በሐር ለህለ፡ እምበል እሊ ዲብ በዴ ገይስ ለህለ ጋብሌ በሐር መ ለለርኤ ተምሳል ቅዱማም ክም ዐለው ወደሕ። እሊ ህይ ምነ ሰቡዕ ዲብ እዲነ ለህለው ሐምስ ዲብ ኤረትርየ ክም ልትረከቦ ለሸርሕቲ።

ብዕድ አኳርዮም ለገንሕመ ህላ፡ እሊ ህይ ዝያድ 750 ኪሎ መትር ግንራራብ በሐር ለመልክ አቅሊም ቅብለት በሐር ቀየሕ ዲብ ለህለ ለትፈናተ ጅንስ ዓሰታት ለገንሕ ወዲብ ሐን በሐር ለህለ ውርስ ጠቢዐት ለለርኤ፡ እብ ናይ በሐር

ግርመት እግል አግሩዝ ዝያድ ክም ልሰሕብ ጋብእ ህላ። ምስል እሊ ዲብ ተላጀት ለበርደ 11 ጅንስ ዓሰታት እብ ሼትርታት ለልትርኤ፡ ቤጽሓይ ምስል ለትፈናተ ጅንስ ዓሰታት ክም ልትኣመር ወዴ። ዲብ ነሻጣት ጀለቦት ዓሰ ለልትፈረረ ዋወራት ጅላብ መ ዲብ መዕረድ ቅዱም ክም ዐለ ወዴሕ።

ነሻጣት ሐርስ ዲብ አቅሊም ቅብለት በሐር ቀየሕ ወምኑ ለልትረከብ ፍሬ ህይ ዎር ምነ እሊ አቅሊም እሊ እብ ሐርስ ርዙቅ ክምቲ ለልትርኤ፡ ፍሬ ተመር፡ አራንሺ፡ ብርጨቅ፡ ካሳሽ ወለትፈናተ ሐመሊት ሐምስ ጅንስ መዐር ወአርሳዕ ናዕ ሐሳሳ፡ ከምስልሁ መ እብ አሰይደ ምንጋስ ሓይላይ ለትቀደመ ክም ሺር፡ በርበሬ፡ ዲኤምከይ ወጥሑን ዓሰ ወብዕድ እግል ዕፌ ቅዱም ዐለ። ቀዲም መባኒ መዲነት ባጸዕ ህይ ክም ከልፍየት ናይለ መዕረድ መጦር

ለከሰሰ እብ ዐቢሁ ህይ ለአቅሊም ለህለ እግሉ ዕቁር ከይራት ምስል አሳር ወብዕድ ለልጸበጥ እግል ለወዴሕቲ። መዕረድ አቅሊም ግብለት ክም ዐቀቦት ህወየት እብ ዕጽፍ እግል ዐማር ኩዲም ሐንቴለ ትብል ስቅራት ለዳለ ጽበጥ ህይ ሰልፍ ክሉ ለልትርኤ አስክ እሊ እንዴ ኢመሸምሽ ወኢከርብ ክምመ ለህለዩ ለህለ ብዙሕ ስኒን ለወደ ጅሰስ ናይ ክልኣት ሚን አደም (መምየ) ምነ ዲብ አቅሊም ለህለ አድባራት ወናይ ደያናት አካን ለትረከብ እምጽኣም ህሌነ ልብል። እሊ ህይ አዳም ዲብ ከረ መስር ሰምዕ እብ እንዲኢትን ዲብ ኤረትርየ ክምስልሁ ህለ ሰበት ኢመሰሉ ዎር ምነ ዐጃይብቲ። ሚ ደወ ገብእ እቲ እብ ከአፎ አስክ እሊ ጸንሐ ህይ ልሰዕ ዲብ ድራባት ህላ።

ለካልኣይ ህይ አቅሊም ግብለት ሰኔት ሓለት ዝላም ምነ ለረከብ ባካት ዐድነ ሰበትቲ ዲብ ህይ ለትፈናተ እክል፡ ቅርጡጥ ወስምስም ሰበት ልትዘራእ እሊ ለልኣትኣምርመ ዲብ መዕረድ ቅዱም ዐለ። ምስል እሊ ውዛረት ሐርስ ጸብጠቲ ለህሌት ናይ ሕሩም ሐዝግት ምን ወክድ ዲብ ወክድ ዲብ ዐቤ ገይስ ለህለ አውጅዶት ናይ መዐር ወኣትፋረዮት ንህብ ለከሰሰቲ። እምበል እሊ ሸዐብ ክም ሰራይ ዓዳት ልትነፋዕ እብ ለዐለ ዕጩ እግል ኢልብዴ ወእብ ዕሉም እንዴ ደረሰ ምን ሐዲስ ዲብ ሳረዮት ሸዐብ እግል ልውዐለ ሸዐብ



ክቅቶብድ



ዮም እግል ኩሉ ለከሰሰ ዓቢ
አርእሰ እንዴ ጸበጥና ማጻምኩም
ሀሌነ፡፡ ወሀቱ ሀዬ እብ ኩሰሰ
እቅትሳድ እግል ልግባእ ቱ፡፡ ዲብ
ጁብኩም አው ዲብ ባንክት ለሀሌት
ሰላዲኩም አሳሰ ምን አያቱ ገብእ
ወትብው? ቀደም መተአንባት
ብነክ፡ አዳም ሰላዲ እብ ከፎ
ለአመጽአ ዐለ ወለተአትሐዝዩ
ሓጀት እብ ከፎ ረክበ አው ልሃበዩ
ዐለ እት ትብሉ ሓሰባም ተአምሮ
ገብእ? እሊ ኩሉ ሰላላት ዲብ
እሊ ናይ ዮም ክቱብነ እግል
ንብለሱቱ።

እዚ ሐቲ ዶል ግረ እግል ነአቅብልቱ። ወድ ቤን-ኣደም ቀደም ኣላፍ ሰፍታት ሰላዲ ሰበት ይወለት እግሉ በዳለ ልትነፋብ ወለ። እሊ ጅንስ ተጃረት እሊ እት ናይ ኣወል ተጠውር ተጃረት ወድ-ኣዳም ለትረኣ ቱ። እሊ ገበይ ተጃረት በሀለት በደለ ኣው መትባዳል እት ድህርት ደረጀት ተጠውር ለዐለ ክፋል ምጅተመዕ ልትርኢ ወለ። ህቱ ህይ ፈርያት ኣው ዐፍሽ እት ትትባደል መትነፍዐት ኣው ዝቤ ወኣንዘየትቱ። እግል መሰል ምር ሐረስታይ ምን ገርህቱ እግሉ ወእግል ዐዱ ለገብእ እክል ለኣቱ። ሳኪን ሐሊብ ኢረክቡ ሐሊብ እግል ልርኩብ ህይ ምን እክሉ እንዴ ከየለ እት በዐል ንዋይ እንዴ ንሰ እበ እክሉ ሐሊብ እግል ልትባደል ሰትት። በዐለ ንዋይ ሳኪን እተ ወቅት ለህይ በደል እክል መዐር ለሐዜ ጸንሕ ወእብሊ በዐለ እክል ሐሊብ እግል ልርኩብ ኢቀድር። ለእተ በዐለ እክል ሐረስታይ ለሐሰለት ምሽክለት እብ ህግየ እቅትባድ ጭመር እትፋግየት ንየይ ኣው’The Double Coincidence of Wants’ ልትበህል። ለሐረስታይ ሐሊብ እግል ልርኩብ እክል ለሐዜ በዐል መዐር እግል ልርኩብ ወለት እግሉ። እብሊ ወለመሰሉ ኣሰባብ እሊ ንዛም ኣው ገበይ ተጃረት እሊ እግል ጠለባት ኣዳም ለኣትምም ውጡይ ክም ይወለ ምን እለ እት ለዐል ለትሸርሐት መሰል እግል ንፍህም እንቀድር።

ቀደም አላፍ ሰኖታት በሀለት፡ ሰላዲ እንዴ ኢትትመሀዝ፡ አዳም ክሉ ምን ዐውል ለቡ ሓጃት ሕሬ ምን ልትበህል ሚወሐረ ገብእ? ለሐርያን ብዙሕ ምንመቱ፡ እት ወቅት ለሀይ ለኪን አዳም፡ ጩዋ፡ አሻም ቡሓር፡ ዓሳ፡ ወአስክ እበን ዐባዩ ከምሰል ሰላዲ ልትነፍያ እቡ ዐለው። እግል መሰል 'ሳላሪ' (Salary) ለትብል ከሊመት እንግሊዝ ማህየት በሀለት ተ። እለ ዘዐት እንግሊዝ እብ ከፎ መጸት ዶል እንብል ምን 'ሳል' ለትብል ናይ ላቲን ከሊመት ለመጽኦትተ። ህተ ህዬ ጩወት በሀለትተ። እብ ሚ ሰብብ መጽኦት ዶል እንብል ህዬ ሮማንዩን ዓሳክር ዶል ዶል በደል ማህየቶም ጩወ ልትደፍያ ሰበት ዐለው ተ። ጩወ ፡ ዓሰ ወአሻም

በሐር ምን እግል ሰልፍ ዶል ወድ አዳም ከም ሰላዲ ለልትነፊዕ እቡ ለዐለ ቱ። ሰበቡ ህዬ ዲበ ውቀት ለህይ ከምሰል ጩወ፡ ዓሳ ወአሻም በሐር እብ ቀሊል ልትረከብ ሰበት ይዐለቱ። ወድ አዳም ጩወ ከምሰል ሰላዲ እግል ልትነፊዕ እቡ ከምሰል አንበተ ፡ እብ ቀሊል እግል ለአትጋዑዙ ኢቀድረው። እሊመ ምሮ ምን መታክል መትባዳል ዐለ። እብሊ ምን ጩወ ዲብ ደህብ ወምኑ ህዬ ዲብ ወረቀት በህለት ለአዜ ንትነፋዕ እበ ለህሌነ ሰላዲ እግል ልጠወር ቀድረ። ምሰል ተጠውር ህዬ ምን ወረቀትመ አስክ ደረጀት በርመጃት እት ሞባይላት ውብዕድ አላት ኤሊክትሮንያት ጠወረ። ምስጢር ናይ እሊ እምብሉ ለጸናሕነ ሚቱ ወትበው? ሰላዲ ጩወ ትግባእ ወውረቅ ለአግደ ገር ሀለዮት አማነትቱ። አማነት ሐቆ ህሌት ቱ ለትሸቂ።

እሊ. ግብ። ወንጌላቢ እቡ ለሀሊ።
ፍረ ካድም ናይ እምበል
መትሐላል ከዲም ከምስልቱ ሐቆ
ትሪሀምን ለገዛም ዝቤ ወመዛባይ
እምበል መዐናቅፍ እግል ልተላሊ
ቀድር።

ምን እሊ እንዴ አትሌነ ለበበ ሞቶር እቅትሳድ እቡ እግል ልህደግቱ ሁቱ ህዬ ዐዳገ ቱ። እግልሚ ጠማጥም እት ከረም ቀሌ ወእት ሐጋይ ረክስ? አው ሞግይል ሐዳስ እግል ሰልፍ ዶል እት ሱግ እት ትትከሬ ትቀሌ ወሐር ትረክስ እንዴ ትበው ክም ትትሰአሉ ወትመራመሮ እሙርቱ። ናይለ መትከራይ ወመትወቃል ዐው፩ ምስጢር እሙርቱ። ዐጋደ ክም መቃዩስ ናይለ ዐውል እግል ንንሰአ እንቀድር። ለመቃይስ ህዬ እት ክልኤ ልትከፈል፡ ለምሮ ጠለብ ናይለ ብዳዐት ገብእ እት ሀሴ ለካልኣይ ህዬ አውጀዶት ቱ። እሊ ህዬ ምስለ ጠለበ ሱግ አውጀዶት አግደ ቱ። እግል መሰል እት ከረም ጠማጥም ምስል ዝላም ወባልዒን ብዙሕ ሰበት ኢወጀድ ዐውሉ እግል ልቅሌ ቀድር፡ እት ሐጋይ ላኪን እግል አፍረዮቱ ሰበት ልትሳህል ብዝሓም ሐረሱቶት እግል ለአፍሩ ቀድሮ ወለዐውሉ ምድር ዘብጥ፡ እብ ሕጭር ለቤለ ሒን እት ቀሎት ወረካስት ዐውል ምህምቱ።

ዲብ እዳረት እቅትሳድ ቃኑን ምርት ሀላ ህቱ ህዬ፡ ተጃረት እድንዖ ሕድድትተ ወጠለባት አዳም ብዙሕ ቱ ለልብልቱ። እሊ ህዬ ሕዲነ ወጀዶት (Scarcity) እንብሉ። ክሉ ሓጀት ምስል እግል ለሀሌ እግልነ ሰበት ኢቀድር፡ እግል ንሕሬ ንትቀሰብ። እሊ ህዬ ሰላዲነ ምስለ ዐውል ሰበት ኢትመሳኔ እግልነ ፡ እግል ነትካፊ። ንትቀሰብ። ክልዶል መትካብየት፡ ለአዳም ለሸቀዩ ወአፍረዩ ሐጃት ሌጠ ለዛበው እንዴ ኢገብሱ፡ እብ ሕርዖኖም ወብዝሐ፡ ጠለባቶም እተ ዐውላ ልትዛበው ሓጃት ተረቶም ዓባደተ። እግል መሰል ዝዩድ ለጠልበው ምንለዕል ክሉ ልትዘቤ ወቀሌ ወለኢጠልበው ረክሰ ወዐውል ልሰእን በሀለትቱ።

እኬ ምን እሊ ለጸንሐነ ዲቡ አርእስ
ፍግር እንደ እንቤ ሀዬ እብ ክሰሰ
እድንያይ ድን The Global Vil-
lage እግል ልግላእ ተ። ላብሳሙ
ለህሌን ልግሰ፡ ለእንሰትየ ቡን ፡ እት
ጁብነ ለህለ ጀዋል ውበዕድ እት
አምዕላይ መዐያን ለንትነፈዕ እቡ
ሓጃት እብ ከፎ እድንየ እንዴ
ከለው እት ሸፍርነ መቼን ?

እግል መሰል ዎሮት ቀለም ረሳሁ፡
እብ ከፎ ትሸቀ ዶል እንብል፡
ለዕጫይ ናይለ ቀለም-ርሳስ ምን
ብራዚል ማእ እንብል፡ ለዲባ ምግብ
ለህላ ርሳስ ምን ስራላንክ፡ ለመሳሳት
ምን ማለጅ፡ ለ ሕብር ምን
ጀርመን እግል ልማክል ቀድር።
ዲብ እድንያ ዎሮት ነፈር እብ በይኑ
ምን ባሕ ቀለም ርሳስ እግል ልሸቁ
ይቀድር፡ አላፍ እንፋር ለትፈናተ
ህግደ ለልትግገው ወለትፈናተ
ቅድረት ለባም እብ መትሳዳይ
ለሸቁ ቶም። እለቱ ህዩ ግርመት
እድንያይ ዐዳክ።

እግልጫ ከሱ ሓጀት ሞሰ ለይአንሽቅዬ፡ ወሚ ሓጀት ዶል ነሐዜ አስከ ሱግ እንሰዔ? እሊ ዲብ እቅትሳድ፡ መንፈዐት ቃረኖት (Comparative Advantage) እንብሉ። ገሌ ዓዶታት እግል አፍረኖት ቡን ለትገብእ አርደት ካፍየት ቡ ወብሰድ ዐዶታት ህዩ መካይን እግል ልሸቀየ ለትጠውራ ቲክኖሎጂ ለህሌ እግለን። እብ ለገብእ ሓጀት እንታጀር ዶል ህሌ፡ ተርኪዝ ዲባ ሕነ እብ ለሐሰ

ገበዩ እግል ገሽቀዩ ለአንቀድር
ሓጀት ሌጠቱ ለጉበኤ። ብዕድ
እግል ገጠደዩ ለይእንቀድር ሓጃት
ሆዩ። ምን ብዕዳም አንፋር እንሰሉ።
እሊ ሆዩ። እግል ክለ ለእዲና
ታጅረት ወደኖ። እብ ከፎ ዶል
እንብል ሆዩ። ለሀይከ ምን ለሀይ
ሰበት ልትነፈሰ ወንፋሶ።

እግልሚ ለበዝሐ ሓጃት ምን ዐዳገ ንትዛቦዩ? ወድ ሚን ኣደም ኣክል ሕድ ላታ መቅደረት ሰባት ኣለቡ ቱ ለበሊሲ። ዎሮ ሓቲ ሰናዓት ምን ቀድሮ ወዎሮመ ብዕደት ሰናዐት እግል ልቅደር ጠቢዒቲ። ምን ኣሳሰ እሊ ህዩ በደል ክሉ እግል ንቅደር እንዳ እንቤ ወቅትነ ፈንጌ ፍንጌ ነኣቦዳ ለእለ እንቀድር ሰኒ እግል ነኣሰ።

ወጅብ በሀለትቱ። ለትፈናተ ዐፍሽ
አው ብዳዐት ነአዘቤ እት ሀሌነ ህዬ
ፈንጌ መዝብያይ ወመትዛብያይ
ክብሪ ዐቢ እንክልቅ ክም ሀሌነ
እግል ንፍቃም ብነ። አሳሰ ናይ
እሊ ክብሪ እሊ ህዬ እት ሰላም
ወመስክብት ዶል ልትበጌ ደማን
ወዲ። እቅትሳድ ዶል እንብል
ለበዝሐነ ምስል ሰላዲ ነአትአሳሰ።
፡ እቅትሳድ ላኪን አሳሰ ዲብ
ፍንጌ ለሀለ ተዋሰል ወመፋህመት
ክምቱ አመሮት ለአትሕዜ። እሊ
ህዬ ሐቲ ደውለት ምን ብዕደት
ደውለት ዐፍሽ ዶል ትዛቤ አው
ተአዘቤ እድንያይት ሰላም ነአሰብቅ
ሀሌነ በሀለትቱ። ለተባድል እሊ
ህዬ እንድያይ ፈሪቅ መሸረከት
ተጠውር ከልቅ።

ገሌ ምኒ ለልክትዐጅብ ሐቃይቅ

1. አወላይት ሰላዲ ውረቅ ቀደም አላፍ ሰኖታት ዲብ ሲን ከምሰል ተአንብተ ልትአመር፤ እተ ወቅት ለሀይ አዳም እብ ጩዋ ወሓጺን እት ልዛቤ፡ ዲብ ሲን ላኪን ናይ ወረቀት ሰላዲ ልትነፍያ ዓለው።
2. ዲብ 1630 ዲብ ደውሉት ሆላንድ(Netherlands), ናይ ‘ቱሊፕ’ (Tulip) ለልትባህል ዕንባብ ምንቅያስ ወልዓል ሰበት ጠለብ ረክቤ፡ ሐቴ ሐብት ምኑ ዐውለ ምን ለዐል ዐውል ቤት ገብኡ፤ እብለ መናሰብት እለ ህዬ፡ ‘ለወቅት እብ ቱሊፕ ማንያ’ (Tulip Mania) አው ሀወስ ናይ ዕንባባ ቱሊፕ ልትባህል ዐለ። ቀሎት ወረካሰት ናይ ለገብኦ ዐፍሽ ምን ሰፈየቱ ወለዐል እብ አዳም ጠልቡቱ ለዐውሉ ልትሐደድ።
3. እሊ እት አምዕላይ መዕያነ ለንትነፋዕ እብቡ ህሌን ሞባይላት (Smartphone) እግል ልትሸቄ፡ ምን ለዐል 40 ዓዶታት ለመጽኦ መዓድን ከምሰል ለትሐዘዮ ልትአመር፤ ምን አሳሰ እሊ ህዬ እት ጁብነ ክፋል እዲኒ ንኡሽ እንዲ ጸበዋነ ንትሐረክ ህሌን በህለትቱ።

3. ርክን እንግሊዝ እግል አጀኒት

Words of the Week

- Save / **ዕቅድ አውጦ አክብ**: To keep money for the future.
 - Example: “I save five Nakfa in my box every week.”
- Coin / **ሰንቲም**: A small, round piece of metal used as money.
 - Example: “Sara found a shiny coin on the road.”
- Share / **ከዋላ** : To give a part of something to someone else.
 - Example: “Ali likes to share his sweet bread.”

The Missing Word Game

Choose from: [Market / Buy / Cow]

1. My father went to the village _____ to sell fresh milk.
2. I want to _____ a new blue pen for school tomorrow.
3. Our big brown _____ gives us fresh milk every morning.

(Answers for parents: 1. Market, 2. Buy, 3. Cow)

- Asset / : Puts money INTO your pocket over time (Yusuf's wheelbarrow & seeds).
 - Liability / : Takes money OUT of your pocket or stays useless (Bashir's red saddle).
2. Money Matters: The 50/30/20 Saving Rule
- 50% for Needs: Food, charcoal/gas, rent, and medicine.
 - 30% for Wants: Coffee ceremonies with friends, or holiday treats.
 - 20% for Savings: Save this immediately! Save first, spend what is left.



ፈሽል ብዳዩት ነጃሕቱ - መዐልመት ሰሚረ ገበይ

እት ተሰነይ ትነብር ሀሌት፡ እት አወላይት ወምግባይት ደረጃት መድረሰት አነሱር ሀይሙ ሙዲረት (ዳይረክተር) ተ መዐልመት ሰሚረ እድራስ መሐመድ (ሰሚረ ገበይ)። ዲብ እለ ሐቀ መድረሰት ዐሊ ግድር እት ጋሽ በርከ ለገደመት መድረሰት እሌ፡ ወለመዲነት ኖሰ ወለ አዜ ሀሌት እት ደረጃት ሐቀ ብዙሕ ሄራር ተ ለበጽሐት ሰሚረ። ተውሊደተ እት ሰነት 1977 ዲብ ከሰለ - ሱዳን ተ። እት ዐድ ዐቤት ወናይ ካልእ ደረጃት ድራሰተ አትመመት። እት ሰነት 1999 ሀይ ዐደ አቲት። ዋልዲነት እብ ስዶሎም ለእብ እስትዕማር ዐዱ ፋግር ለዐለ ሽዑብ ምን ሶዳን ዐዱ እግል ልእቱ ዶል አንበተ እንዴ በድረወ አተው ወዲብ ፋንት ሐድረው። ህተ መድረሰት እትምምት ሰበት የዐለት ግራሆም ምስል ሱዳንዩን ፈተች ዓይሉት እንዴ ተርፈት ምህርህ አትመመት። ወእት 1999 ክም አቲት እባህ እት መዐሀድ መዐልሚን (መርከዝ ተአሂል መደርሲን TTI) ሐቲ ሰነት እንዴ ደርሰት እት ሰነት 2000 እብ ሽሃደት መዐልመት ትደሐረት። ወምነ አሰክ እለ 26 ሰነት እምበል አትካራም ተአደርሰ ሀሌት። ህተ ለአድረሰቱም መደርሲን እንዴ ገብአው ምስል ሽቁ ወምዲረት ክም ገብአት እት ሐንቴህ ለአደርሶ ሀለው። መደርሲን ሌጠ እንዴ ኢጉብእ እት ክል መጃል ሽቅል ሀለው። “ደረሳይክ ለዐለ ደረጃት እንዴ በጽሐ እሊ መዐልምቱ ቤሌክ ምንገብእ፡ ለትሸባር እብ ሐበን ኢልትወሰፍ ክምለ ታጅ/አክሊል ለሰቀልክ እንተ” ትብል መዐልመት ሰሚረ።

እለ እት መሀረጃን ኤረትርየ 2026 ዲብ ኤክስፖ ለረከብናህ መዐልመት ሰሚረ፡ አወል ሽቅለ ዲብ ጋሽ በርከ ምዴርየት ድጋ እት መድረሰት ሐሻኪቶ ሽቅለ አንበተ። ምኑመ ዲብ መድረሰት ተክረሬት ክልኤ ሰነት ወዴት። ሐቀሁ ዲብ ምዴርየት ገሉጅ እት አክሊላት ዲብ መድረሰት ዐብደልቃድር ከበሬ አርበዕ ሰነት ሽቁት። ሐቀሃመ ባክ ዐደ እንዴ ትየመመት ዲብ ፋንት - ምዴርየት ተሰነይ ዲብ መድረሰት ዐውደ-አርበዕ ሰነት ክም አድረሰት፡ መዲነት


ተሰነይ አቲት ወዲብ መድረሰት መስተቀበል ሐቀለ አድረሰት ምን ሰነት 2021 አሰክ እለ ዲብ መድረሰት አነሱር ሙዲረት እንዴ ገብአት ትሸቁ ሀሌት።

ዋልዲነት በክት ድራሰት ራክባም ምንመ ኢትን መንፈዐት ድራሰት ሰነ ወአማን ሰበት ለአሙረ ውላዶም እግል ልድረሰ እሎምቱ ለፈቱ። ዋልዲነት ረቢ ልርሐሙ ወእምዬ ስምር ወዓፍየት ለሀበ እዬ እለ ደረጃት እለ እብ ፈድሎም በጽሐክወ። ሐውዬ ወዝያድ ለአግዋርነ ለዐለው ሱዳንዩን ምን ዐጂ እንዴ ተረፍት መድረሰቱ እግል አትምም አብ ወእም ገብአው እዬ ወአትናየተወኒ ህቶምመ ሐምዴ ተአሰትህሎም።

እመ፡ እት ሱዳን ዕዱ መሕበር ወጠን አዋልድ አንሳት ሌጠ እንዴ ኢትገብእ እት ክወን ለዐለ መትነዝም መስኡለት ናይ ምር ሐሽም/ኸልየት ዐለት። ንዝምት ወፋዝዐት ምን ዐለት ሀይ እት ተዕሊም እግል ልፈድሶ፡ ወጠኖም እግል ልፍተው ወልክደም፡

እት ህተ ትነብር እቱ ወትሸቁ እቱ ለሀሌት መዐያታት ተዕሊም አንሳት ሰበት ኢልአትናይት፡ እት ዐለምት አዋልድ ሚ ለለዐንቅፍ ፈሀም ክም ዐለ እግል ትትፋቀድ እት መጽአየ ሰኣል ዲብ ትበልሰ ሰሚረ፡ ክል ገቢል ለረብ እብ አፍካር ሀለ እት ሐቲ ላሊ ሕደን ኢልትብሀል። ላኪን እብ ህቶም ልትከቦት እንዴ ቀረብኩሆም ትመቅረሕኩሆም ምንገብእ የም መንፈዐት ምህር ለኢልአምር ከወለቱ ምን ድራሰት ዐድ እግል ተዐል ለለሐዜ ኢሀለ በሃሊት ተ። ለመዐልም እት ምድር ምስሎም እንዴ ትገሰ ገዱ እንዴ አብረህ ወዲሆም እንዴ ቀርብ እብ ህግያሆም ሐቀ ልትሃጌ ለልሐዝየ ልእከት እብ ቀላል ለአበጸሐ። መዐልመት ሰሚረ እትሊ ክሉ ስኒን ናይ ሽቅለ ምን ሽዑብ ለመጽአየ ሽቅለ ለትክል መካይድ ኢረኤት። እግል ዐባዩ ክም ዋልዲነት ወእግል ነኣይሽ ክም ሐወ እት ትትመቅርሐም እት ምህር ክም ልትሐሰር እግል ቲዴ ቀሊል ገኣ እሉ። ሐቲ አሰክ እለ

ትሰትየ ዊደት ቡን እብ ሰከረ፡ ሐቲ ለትረክበን ግሬሻት ርያል ትግበእ ወሐምስ ርያል፡ ሐቲ ብዕደት እብ ሳቡነት ትመጽእ። እሊ ክሉ እንዴ ትጀመሪ ዲብ ደንገብ ሳምን፡ ምንን ለሕግዝት እት ቤተ ዊደት ቡን አሉብዬ ለትብል እግል ልትህየብ፡ ለሳቡን ለብዕድ እት ሰለሰ አርበዕ እሊት ልትካፈል። እብ ክእነ ማል እግል ልትኬለል ክም መጽአ እንትን ምንእለ ወሐር አንሰ ዳርሳት እንትን ርሕክን ሰደየ። እት ፈረሕ ወሐዝን ለትትዓወነ እብ ዐፍሽ ውደየ እንቤለን ክትብገሰየ ወእቡህ ለሰንዱቀን እት ለዐቤ ጌሰ። ምን ፈጃጃን እንዴ ሐልፈ እግል ዳሰ ለከፊ ትነጅ ወዐፍሽ መልክ። አነ ምነ አካን ምንመ ትቀየርኩ አሰክ እለ የም ፈቅዲኒ እብ ሀለየ። ላመ አጀኒት ገሌ ኢንጂነራት ገብኣ ወገሌ እት መካትብ ሀለ እብ እለ ግስት እረክቦም። ዲብ ፋንትመ እለ ትመሰል



ዕልም አጽበጠት ወእት ቤተ እትደ ወሰከት ወእዳረት እትየ አመረት፡ እንቲ ትነፈሰኪ መኢትን ክም እብለን ብዝሓት ለእግል ትፍገር ሓሰባት እለ ዐለየ ወለት ምህርህ ተአተላሌ ለሐድጋህ።

ዋልዲነት ሰሚረ እግል ክሎም ውላዶም አድረሰምም ወአሰክ ክድመት ወጠን ሳረሐምም አዳም እምበል ወጠን ሽረፍ አለቡ ወእምበል ዕልም ወቀይ አለቡ ለትብል እምነቶም እት ተርፎም አሰበቀው።



ለረክበም ዕልም እት መንፈዐት ወጠን እግል ለአውዑሉ ሽመይ ገበይ አጽበጠቶም። ሰሚረ እምዬ ቀለም ወክራሰ እንዴ ጸብጠት ዳርሰት ምንመ ኢትን ለፍክረ ወለፈሀመ ምንለዐል ዕሉማም ሰበት ገብኣ ሕነ በክት ድራሰት ራክበት ምንትገብእ ሚ ደረጃት ወበጽሐት እንብል ወክምለ ዳርሰት ነሐሰበ ወንትመቅረሐ ትብል ሰሚረ።

ለትትሐበን እብ ተጅርበት ዲብ ተሓኪ መዐልመት ሰሚረ “ዲብ ተክረሬት ምህር ዐባዩ ተአደርሰ እት ዐለት ዲብ ወክድ እግል አንሰ ለደረሳህ ምስለን እንዴ አመሕበረት እት መድረሰት እግል ክትብት ወቅራኣት ሌጠ በደል መጸኢ፡ ክም ዕቁብ መሰል እንዴ ወደየ አመት ሕድ እግል ልድለየ ወሕድ እግል ልሰደየ ለቀድረ እብ ገበይ ባሰረት። ሐቲ ለእት ቤተ

ጀምዕየት እግል ኢዴ ጀረብኩ ለአንሰ መብዝሐን ናራተን ሰነ ልፍዕለ ወለትፈናተ ፈርያት ክዐሌ ለአዳልየ፡ ምናተ ክምለ እለ እትዐሽም ኢጉብኣ እዬ ለአካን ምን ዕዳገ ረዩም ሰበት ገብኣ። እምበል ፍዕሎ ብዕድ ወራት እዴመ ጀረብኩ ዓረርት ምላያት ወክያጠት እንዴ ተዐለመየ ለበለ ምላያት ደለ ሰኒሁ እት ሕድ እንዴ ትለፈቀ ሽክል ግሩም ክም ለሀሌ እሉ እንወዴ። ወእሊ እት ሙጅተመዕ ቅቡልየት እንዴ ረከብኩ ተዕሊም አዳም እብ ምራድ እግል ልሻርክ እቱ እት ውድየት ሰዴኒ።

ሰሚረ ለልእከትክ እብ አዋምር እንዴ ኢጉብእ እብ ነሳይሕ ቀሊል ሐቀ ተሓልፈ ለአዳም ነሰኣ ምንዝ። እለ ወለቼ ገድም ዐቤት አዜ መድረሰት ሚ ትነፈዐ ዶል ልብላሂ “አማንኪቱ እግልኪ ሐቲ ኢትወዴ እኪ አናመ እግል እምዬ ሚ ወዴት እሊ፡ ላኪን እትለ እግልክን እንዴ ዐለምኩ ሰሚቹ ትወቀለት ምንገብእ ሰሚት እወቅል። እብ ራትብዬ ምን መሕዝ አርተዕክወ ወግማት እት ተሐዜ እቱ ገበይ አርኤክወ ምንገብእ እለደየ ሀሌኩ። ወለትኪመ ዳርሰት እንዴ ገኣት ሐቀ ተዐለመት ወአጀኒት ገበይ

መዐልመት ሰሚረ ሐምስ ሰነት ሐቀለ አድረሰት እት ሰነት 2005 ተሀዴት። ምናተ ሰለሰ ሰነት ምስል ክም ጸንሐው እግል ለአተፍቀ ኢቀድረው፡ እምበል በአሰ ወተልተለት እብ መቅራሕ ሰነ ትፈናተው ወክም ሐው ነብር ሀለው። እንዴ ትነብር ዐለት እት 2015 ለናሰበ ክም ረክበት ተሀዴት። እሊ ናይ አዜ እዩህ ዲመ ደረጃት እግል ትወቀል ወለአምረ እት መግል ገቢል እግል ልውዐል እብ ንየት ሰኒት ክም ሰድያቱ ለተሓኪ። ለገብኣት አንሳይት ሐቲ ዶል እንዴ ጀረበት ፈሽለ ምነ ምንገብእ ሰእየት እግል ትብተክ አለበ። “ምስልዬ ፈሽል እምቲሓንቲ ውብዳየት ነጃሕቱ። እት አወላይ ጀርቤክ ሐቀ ትፈሽል እሊ ደማርቱ እንዴ ትቤ እግል ትብጠር አለብኩ። አወል ለበርናመጅክ እግል ተአምሩ ብክ ወለእሊት በዐል ሰቡር እግል ትግበእ ብእተ። ከዳርሰት ገኣት ምንገብእ ከኤፍ ሐል ትወዴ ተአምር፡ አሰክ መትፈናታይ ትበጽሐ ምንገብእ፡ ለክልኣት ዐድ ዲብ በአሰ ወአከይ መቅራሕ እንዴ ኢተአበጹሕ፡ እብ ሰላም እንዴ ትፈናቲክ ክም ክልኣት ሐው መንበረትክ እግል ተአተላሌ ለዕልም ሴድያይ ቱ፡ ፈሀምክ ሰበት ለአፈይሕ። ነፍሰ እግል ትቅብብ ወንዶት እግል ተሓጭር አለበ። እብ ሰብር እንዴ ፈከረት ምን አመረ እት ሐዳር ኢተዐወተት ምንገብእ፡ እብ ብዕድ እግል ትንጀሕ ክም ትቀድር እት ዕልም፡ ተጃረት፡ ብዕደት ምህነት እግል ትትዐወት ትቀድር” ለትቤ መዐልመት፡ እብ ረአየ ሰበር ወአክላቅ ለትመልክ ወሀደፈ አክል ሕድ ለካርየት ዓቅለት ካምለት ናጅሐት ተ።





አልፈ-አልፈ ወለትዋፍቅ ምስሉ ትርበት

2ይ ወናይ ደንጎበ ክፋል

አልፋ-አልፋ፡ ምሮት ምን ለሐሰ ዐለፍ አክደር ናይ ንዋይ ቱ። እሊ ብቀል እሊ፡ እብ አሳሰሰ ህለ እቱ ውቁል ጽበጥ ቅዝእ ወሐቱ ዲብ እተይ ሐሊብ “መልክ ዐለፍ” (Queen of Forages) ልቡሉ። ሐረሰቶት እብ ዋጅብ እንዲ ዘርአዉ ራዐዉ ምን ገብእ፡ እተይ ሐሊብ ለልክበርክት ወሐ ስጋመ ለረሽድ ቱ። ከእብ ክሰብ አልፋ-አልፋ፡ ሐረሰቶት ምን እግል ለአሙሩ ለወጅቦም አሳሰቦይ ቀጃት፡ እትሊ ካልኣይ ወናይ ደንጎበ ክፋል እሊ ተሌ ካትባም እኩም ህሌኩ ቅራኣት በኪተት፡

አልፈ አልፈ ሰኒ እግል ልብቀል ገአ ምን ገብእ፡ ታጅረት ወእብ ቀላል ጠላለት ለትበይኣ ትርበት (ጢነት) ተኣትሐዝዩ። እተይ ሰኒ ጀላብ እግል ለህብመ ውቅል መሉሐት ጨበል (ምን 6.0 አስክ 6.5 pH) ለበ ትትሐፊ።

ጠለብ ማይ

አልፈ-አልፈ ምስሉ ብዕድ አክደር ዐለፍ ንዋይ እት ልትመጣወር፡ እብ ሰዓይት መድሀር አቅሩዱ ለሐሰ መትነፊዕ ማይ ልትወለብ።

ለውሽዕ አቅሩዱ እት ጠላለት ለቡ ጨበል ኢበቅለ ምን ገብእ፡ ለሕፃን ጥል ዐቦትላ አቅሩድ እንዲ ሀንኡ፡ እተይ ሰኒ ክም ኢሊህብ ወድዮ። አልፈ-አልፈ ቀደምለ ዝርአቱ፡ ሰኔት ትርበት ዲበ ለበቅለ አቅሩድ፡ ዐቦት ሻፍገት ለአርኤ።

እት ጢነት ወሐጸ ለበቅለ አልፈ-አልፈ፡ ሕፃን ማይ እግል ኢልኣድምዑ መታብዕት ሰኔት ተኣትሐዝዩ። እግል ክልኢቱ መሳሊሕ (ናይ ዘርእ ወዐለፍ) ለገብእ አልፈ-አልፈ አሰክመ ለዐንብብ ማይ መሰኖ ካሬ ለኣትሐዝዩ።

ምናተ፡ ፈርያት ክም ወደ ለማይለ መሰኖ እት እንራቅቡ፡ እብ ቅያስ ሐድ ነሀይቡ። ሰበቡ ህዩ፡ ክምለ እንዲ ተወጪደ እግል ዐለፍ ንዋይ ለገብእ አልፈ-አልፈ፡ እግል ዘርእ ለገብእ ሐቆመ ገኡ ብዝሐሊ ማይ እግል ለአሰክቡ ወለኣትኣድጉ አውመ ሰኒ ክም ኢለዐንብብ ወጽኂ ክም ኢወዲ ገብእ። እሊ እብ ተራቱ፡ እግል ለአጸግዩ ተብዕን እት ሽቅሉ ለዐናቅሩ።

እብ ዋጅቦት መራቀቡት ማይ መሰኖ እት ገብእ እሉ ለአብቀልካህ ሰዐር አልፈ-አልፈ፡ እተይ ዘርእ ብዞሕ ለህይብ፡ ለኔብራይ ሽትል እንዲ ተወጪደ ዘርእ ክም አኩብክ ምን፡ ለገርህቱ እተ ዶለ ማይ እግል ትሰቱ ወጅብ።

ሕማማት
አልፈ-አልፈ፡ ምን ወክድ ብቅለቱ አሰክ ፍሬ በጹሕ፡ እብ ለትፈናተ ናይ ቀጠፍ ወአቅሩድ ሕማማት እግል ልትጸበጥ ቀድር። እግል ልምእኦ ለቀድር ሕማማት ጀላብ እግል ልትሀወን፡ ለትፈናተ አብሳር እግል ልትሳበር ቀድር።

ገሌ ምን ፍገራት ለልሀይብ አግቡይ ህዩ፡ መትነፊዕ ስም ባልዲን፡ ዐቂብ ርሽድ ትርበት፡ እሙር ሒን ዐጪድ

ዕቅቡት፡ ራቀቡት ሀረሞ፡ አሰተዮት ማይ ካሬ ወራቀቡት አዝረኣት እግል ንሳሚ እንቀድር።

አግቡይ ዐጪድ አልፈ-አልፈ ሚዶል ወእብ ከአፎ?

እሰልፍ፡ አልፈ-አልፈ ምን ወክድ ብቅለቱ እንዲ አንበትኩ ምን 90 አሰክ 120 ምዕል እተ ህለ ወክድ ልትወጪድ። እብ ሐዲሱ እት ክል ምን አርበዕ አሰክ ሰበ ሳምን ለህለ ወክድ እብ እትጀህ እትጀሁ ተወጭዱ። ክእነ ገአ ምን ገብእ፡ እብ ጽበጥ ምን ገብእ ወበርክት እተይ ሰዐር ወመደቱ እግል ትትራየም ነፌዕ።

እት ሕፋን ወይቡስ ድዋራት እንዲ ትዘረኣ እብ መሰኖ ለሰቱ አልፈ-አልፈ፡ ምን ልውሕድ ምን ሰበ አሰክ ዐሰር ኢነት ልትወጪድ። ምን እሊ ለልትረከብ እተይ ህዩ፡ ምን ኦሮ ሄክታር ምን 40 አሰክ 60 ኩንታል አልፋ-አልፋ ገብእ።

ሒን ዐጪድ፡ ምስል ደረጀት ሰልፋይት ዐቦት ወተራች ዕላቀት ቡ። አልፋ-አልፋ፡ ምን 25 አሰክ 50 ምእታይት ፈርያት ዶል ወዲ እግል ልትወጪድ ቡ። እግል ኢልሕጪር ህዩ፡ እተ ሰልፋይት ኢነት ዐጪዱ፡ እንዲ ኢለኣክል እንዲ ሽፈግከ እግል ልትወጪድ አለቡ።

ምን ክልኣት አሰክ ሐምስ ፍርዕ ሌጠ ለቡ ብቀል አልፈ-አልፈ እግል ልትወጪድ አለቡ።ሰበቡ ለሽፋገት ወሽዐቱ ትነቅቡ፡ ሀረሞ በኪሕ፡ እተይ ልውሕድ፡ ክምሰልሁመ ዕምርለ ብቀል ክም ለሐጭር ወድዮ። ሰበት እሊ ቱ ዐጪድ አልፈ-አልፈ እብ መትደጋግ ወወክዱ ዲብ ተወቅብ ለትወድዩ።

እሊ ህዩ፡ ብዋረትላ ነዐጭድ ምን አልፈ-አልፈ ምን ሐምስ አሰክ ዐሰር ሰንቲምትር አቅሩድ እግል ንሕደግ እቱ ወጅብ። ሰበቡ ህዩ፡ እሊ ብጠር ለቡ አልፈ አልፈ ሐደግከ ምን ገብእ፡ ለምንተሐት በቅል ዲቡ ተራች እንዲ ኢልትኣኪ እግል ለዐንብብ ቀድር።

አግቡይ ሐየቦት ዘርእ አልፈ-አልፈ

ትሩድ ብቀል፡ እተይ ብርክት ለህይብ፡ ምን ትሩድ እት እንቱ ለልዐቤ ብቀል ለነኣትዩ እተይመ ሕሩይ ቱ። ሀረሞ እግል ንወርኬ ወንራቅብ ኢገአ ምን ገብእ፡ አልፈ-አልፈ ቀደም ምዕሉ እግል

ልትወጪድ አለቡ። እት ስምጥለ ገርህት አልፈ አልፈ ቀፎታት ንህብ ወዲን ምን ገብእ፡ በሽል ወጽኂ እግል ለኣትናይት ሰበት ቀድር፡ እተይ ወጅብ ውበርክት ምን ለህይብ አብሳር ቱ።

ለሕብር አልፈ-አልፈ ምን 65-75 ምእታይት ዲብ ቡናይ ነትል ሐቆ ረኤናህ፡ ለሐሰ ወቅት ዐጪዱ ታምም ክም ህለ ሰበት ለሐብር፡ እትሊ ወክድ እሊ ዕጭደቱ ምን መቀርዐይ ልድሕን። እግል ዘርእ ለገብእ እተይ አልፈ-አልፈ፡ እብ ሰለበ ገበይ በሀለት፡ እብ ሽሚጥ፡ እንዲ አይበስክ እብ ድግደግ፡ አውመ እንዲ ዐጪድክ ክም ዩብስ አክዩዶቱ እግል ልትኣከብ ቀድር።

እተ ተወጪደት ገርህት ለተርፍ አቀጥፍ አልፈ-አልፈ፡ እንዲ ዐጪድክ አውመ እብ ቀንበለ እግል ልትወርኬ ቡ። እብ ማይ መሰኖ ለፈረ እተይ



አልፈ-አልፈ ምን ሄክታር ምን 2.5 አሰክ ሰበ ኩንታል እግል ልትጨንገዕ ቀድር።

ምስል ሓለት ጀው ዐድኑ፡ እት ሰነት ምን ሰለበ አሰክ አርበዕ ዶል፡ አልፈ-አልፈ ነዐጭድ ወእተይ እንረክብ ምን። እት ወክድ ከረም ህዩ፡

እግል ዐለፍ አክደር እንዲ ትበህለ ልትወጪድ።

ዲማት፡ እብ ቂድረት መጃል ምድር ሰዐር፡ መንግሥቱ ሩኣሶም አርኣዩ ወጅኢ ካዮሊ ለትዳለ ሕሩይ አዝረኣት ምድር መሸፈል ለልብል ክታብ ውዛረት ሐርስ

ቴክኖሎጂ ሐርስ




እተይ ከመዶር ለልኣሬ ሮቦት እት ጀርቢ
ቢልጃም፡ እትይ ከመዶር እት ሰነት ጎነ እት ግረህ ከመዶር እግል ቀንዋሽ እብ በሰር ሰኒ ለልኣሬ ሮቦት ትጀርብ ክም ቱ ኣትኣመረት።
ሐዲስ እግል ሰልፍ ኢነት እትለ ለዱለት፡ እግል እት ጃፓን

ለመርከዝ ክባንዩት ቴክኖሎጂ ስናዐት ኣላት ሐርስ 'ኢናህ' ለሽቂቱ እት ሐርስ እንዲ ጀረቡቱ እግል ትሸቂ እቡ ተሐዘ ህሌት። ለሮቦት ደፃም ዲብ ኔዘርላንድ እተ ትዳለ እሉ ናይ ክልኤ ሰነት ወቅት ጀርቢ እብ ሰርገል ክም ኣትመማቱ እት ሸቅል ልትዐዲ ለህለ።

እተ ናይ ኔዘርላንድ ጀርቢ ለሮቦት እት ኣሪ ከመዶር ፍገራት ሰኔት ትረከቡት ምን። ክል ሮቦት ዲብ ሳዐት ዝያድ 20 ኪሎ ከመዶር እት ለኣሬ፡ እተ ናይ ክልኤ ሰነት ጀርቢ ፍፅል እት ረኣሰለ ኣርኣዩ ውቅል ቢቃዐት ኣፍረዮትመ፡ ለገኣት ከራብ ክብድት ኢሳደፈቱ። እብሊ ህዩ፡ ደማን ሰኔት ለቡ ክም ቱ ተኣከደ። እትለ ጀርቢ ቢልጃመ ለሮቦት እለ ትመስል ፍገራት ኣሰጀለ ምን ገብእ፡ እብ ዐውል ረኪስ እት ኣሰዋግ ዐለም እግል ልትዘቤ ክም ቱ ተኣመረ።

ካርቱን ፍሬ-ካድም



እብ ውዛረት ሐርስ ለልዳሌ ዓሙድ ቅዝእ ለበ መነት፡ እግል ክሉ ወእት ክሉ!

ለትውቀል ፍክር ሐንገል ለቦም መጽተማዕ ለትመልክ ዱለት

እት ቅሰም ፈልሰፊት አውመ እት ቅሰም ሰናዐት ዓለም እመራም ላቶም ዐባይ ፍላስፋታት እግል ልግብኦ ቀድረው። እግል ዐዶም እት ጠወርት ለትውቀል ዶር ለቦም ወእግል ዐዶም ሐቲ ምን ለሐሰየ ወለጠወረየ ድወል ዓለም እግል ልውደዋ ለቀድረው ለትውቀል ፍክር ሐንገል ለቦም ሽዑብ እግል ትምላክ ለቀድረት እት ኤሰየ ለትትረከብ ደውለት ሲንጋፖር ተ።

እት ቅብለት ኤሰየ ለትትረከብ ንኢሽ ደውለት ሲንጋፖር እግል ትርኣየን እብ ለልኣትፈክረ 50 ነኦይሽ ጀዛይር ለትከወነት ተ። እለ እግል ዋወራት ድወል ምውዳቅ ጸሓይ ወእግል እት ድወል ኤሰየ እብ ድራሰት ለትውቀላት ደረጀት ለትመልክ ህንድ እንዴ ቀልበት ለትውቀል ፍክር ሐንገል ለትመልክ ሲንጋፖር፡ 94 ምእታይት ምን



ሽዕበ ተዕሊም ለቦም እት ጉበኤ እግል ልቅራእ ወልክተብ ቀድር። እለ ዱለት እለ አሽቃል ተጃረት ወሰናዐት ለትውቀል መትሐሳር እንዴ ሀበት ለትሸቄ እት ጉበኤ አሰክ 6ይ ፈሰል እብትዳእየት እብ በላሽ ክም ተኣደርሰ ልትሸራሕ። እብ ተውሳክ ዝያድ 65 ሚእታይት

ምን ሽባባት ሀድ እት ለትውቀል ደረጀት ታዕሊም ለህለው ቶም። እብ ሰናዐት ለልትአመረ ድወል ክም አሚሪካ፡ ጀርመን፡ እስራኤል ወሩሰየ ለመሰለ ድወል እንዴ ሐልፈት ለትውቀ ፍክር ሐንገል ለቦም ሽዑብ ለትመልክ ደውለት እንዴ ገብኣት ስሚት ትትረከብ።

ብልዐት ቸኮላታ ሽዑር ሰኒ እግል ልህሌ እግልን ሸይ



ለትኣፈሬሕ ሓጀት ዶል እንረክብ እብ ለትፈናተ አግቡይ ናይ ፈርሐት ሽዑር ልትሰመዐ። ሽዑርን ለልኣኬ ዶል ሳድፊ ህይ እንግሄ ወንሐርቅ። ከእግል እለ መሻክል እለ፤ እግል ሀወኖት ለሳዕድ ጅንሰ ነብረ ቸኮላተ ክም ቱ ዑለማእ ሸርሐ። እሉም እብ ክሰሰ ነብረ በሐሰ ለወዱ ዑለማእ፡ እት ሽዑር መትረባሽ ሀለዮት ምሰለ እት ነፍሰን ለጀሬ መትረባሽ እት ጀፈርን ለህለው አንፋርመ እበ ሽዑር መትረባሽ ክም ልሽዕሮ ልትሸራሕ።

ለዑለማእ እንዴ አትለው 85 ሚእታይት ናይ ካካዎ ጽበጥ ለቡ ቸኮላተ ክል አምዕል ንስኣት እግል ሽዑር መትረባሽ ክም ለኣንቅሰ ለሐብር።

እግል ሽዑር መትረባሽ እግል ለሀድእ እንዴ ትበህለ ለልትካእ ሕቡብ ህሉ፡ ምናተ እብ ብዝሐ ሕቡብ ንስኣት ናዩ መደረት ቡ። እት ቸኮላተ ለህለ ካካዎ ንስኣት

እምበል መደረት እግል ለልትሰመዐን ሽዑር መትረባሽ እግል ሀወኖት ተረት ዐባይ ክም ቡ ለዑለማእ ወድሐ።

ለዑለማእ ለበሐሰ ወዱ እት ህለው ምን 20-30 ለዕምሮም ዝያድ 150 ውላድ ወአዋልድ ሽባባት አሻረከው። ሐቀ እለ እብ

ለትፈናተ ጅንሰ ካካዎ ለትሸቀ ቸኮላተ እግል ሽባባት እንዴ ሀበው በሐሰም አንበተው። ለመሻርከት እግል ለትሀየቦዮም ቸኮላተ እግል ሐድ 6 ወሬሕ ለገብኢ አምዕልተ ክም በልዑወ ገብኢ፡ ፍገራት ናይለ በሐሰ ለ85 ምእታይት ምን ካካዎ ጽበጥ ለቡ (dark chocolate) አምዕልተ በልዎ ለዐለው ሽባባት፡ ክል ዶል ሽዑር መትረባሽ እተ ሳድፎም እቱ ወክድ ምን ቸኮላተ ዶል ነስኢ እብ ሀዳኣት ወራሐት ልሽዕሮ። ዐክሰ ናይ እለ ድሀር ዐደድ ጽበጥ ካካዎ ለቡ ቸኮላተ ለነስኣው እግል ናይ መትረባሽ ሽዑር እበ ቸኮላተ ሌግ እግል ልንቀሰ ኢቀድረ። እት ደንገበ ለዑለማእ ለእሉ እነስኢ ስከር ለቡ ጅንሰ ነብሪት ምን ዐደድ ወልዐል እግል ልግባእ ክም ኢወጅብ ነስኣው። ሰበቡ ስከር ብዙሕ እት ዓፍየትን መደረት ክም ለኣጀሬ እግል ነኣምር ወጅብ።

ተአምሮ ማሚ?

- መሲቀት ስምዐት እት ሓቀቀት ነብረ ተረት ዐባይ ቡ።
- እት አፍን ለልትረከቦ ባክቴርያ ምን እት እድንዩ ለልትረከቦ አንፋር ክም በዝሐ።
- ዕንታትን እቅሙጭ እት እንቱ እግል ንሃጥሽ ክም ይእንቀድር።
- ምን ለዐል 90% ሕማማት እብ ደቅጥ ክም መጽእ።
- ጭገር ወጭፍር እደይ እብ ከራቲን ለትሸቀ ክም ተ።

እት ሰጅል ዐለም ለትሰጀለ እብ ዕምር ለነኣሽ እመር ረሳም

ኤሰ-ሊያም ናና ሳም አንክራህ፡ ወድ ሐቲ ሰነት ወ152 አምዳላት እት ህለ ቱ እለ እግል ትእመኑ ለኢንቀድር ምስትንክር ለሰጀለ። እም ኤሰ-ሊያም እብ ክሰሰ ወልዳ እት ሸሬሕ፡ ህተ መቅደረት ወልደ ወድ 6 ወሬሕ እት እንቱ ክም ትፈሀመየ ትሸሬሕ። ሸቅል ኤሰ-ሊያም እት መዲነት ኣክራ ለልትረከብ መትሐፍ መዕረድ ገብኢ እግል። ምን እተ መዕረድ ለቀርበው ሰወር ለዐሰር ክም ዘበየ ልትሸራሕ።




ገሌ እብ ክሰሰ ሰራይር




- * ሐድ 10 አልፍ ለገብኢ ጅንሰ ሰራይር ህለ።
- * ለነኣሽት ሰፊረት ምን ሃሚንግ በርድ ለልትብህለ ጅንሰ ሰራይር እት ገብኢ ሪመ ምን 75-13 ሰንቲምትር ገብኢ። እለን ጅንሰ ሰራይር እለን ገጸን ሐር እግል ልንፈራ ቀድረ።
- * ፐንጊን ምን ለልሐምሰ ጅንሰ ሰራይር እት ገብኢ እግል ልንፈረ ለኢቀድረ ጅንሰ ሰራይር ተን።
- * እት ዐለም ለዐቤት ሰፊረት ሰገን እት ገብኢ እት ሰዐት ሐድ 70 ኪሎ ምትር ናይ ሰዐይ መቅደረት ለበ ለሸፍገት ሰፊረት ተ።

10 ፍንቲት ሕዘው



ለዘት ሐያት ዲብ ጽባጥ ወኖሪ ጋራት ትተንከብ

መደት ሐቲ እት ጃምዐት ለዐለው ደረሰ ምህሮሆም እንዴ አትመመው ሸቅል እግል ለአንብቶ ክምሰል ቤለው፡ ገሌ ምኖም እንዴ ትጀምረው ለፈትው መደርሶም እግል ልጋንሐ ወምኑ ምክር እግል ልርከሶ ሰበት ሐሰበው፡ ሀድዮት እንዴ ትዛበው ዲብ መደርሶም ጌሰው፡፡ ለመደርሶም ሰኒ ትከብተዮም ወአስተርሐ ቤለዮም፡፡ ህዮም እግል መደት ሐቀለ ተሃጀከው፡ ሸቅል ለአንብቶ ክምሰል ህለው ወምኑ ምክር ክምሰል ለሐዘኑ አሰላለው፡፡ ህቲ ዲብ ከሺነት ቡን እንዴ አፍላሐ ወለትፈናተ ከባቢ እንዴ ጸብጠ መጽእዮም፡፡ ለከባቢ ሰሩ መሪ ቃሊ፡ ሰሩ ረኪሱ፡ ሰሩ ሕብሩ ለአጭረዋራሕ፡ ሰሩ ህዬ ሕብሩ ክፉእ፡ ሰሩ ነኦይሽ ወሰሩ ዐባዩ ዐለ፡፡




እግለ ከባቢ እት ቀደሞም እንዴ ከባቢ ለክፉእ እንዴ ነሰአው ዐለው ወሰተው፡፡ ለመደርሶ ለአተቃብሎም እንዴ ዐለ፡ “ዲብ ለዘት ናይለ ቡን ሚ ፈርግ ርኡኩም?” እት ልብል ትሰላለዮም፡፡ ህዮም ህዬ፡ ሲመ ፈርግ ክምሰል ይዐለ አሰላለው፡፡



ከረዩ፡ ምን እሊ ከባቢ እንዴ ሐፊኩም ቡን ዕለው ከሰተው ቤለዮም፡፡ ለደረሰ ክሎም ምነ ለቃሊ ወሕብሩ ግሩም ሐረው፡፡ ምነ ክፉእ ለሐረ ይዐለ፡፡ ቡን ክምሰል ሰተው፡ “ክልኩም ከባቢ ግሩም ሐፊኩም፡፡ እዜ እሊ ከባቢ ለክፉእ እንዴ ነሰኡኩም ሰተው” እት ልብል አማውር ሀበዮም፡፡ ምነ

ለመደርሶ ሰሕቅ እት ወዴ፡ “ምን እለ ጀርባ፡ አዳም ምን ሕኔት ዲብ ጀንሰ ዲብ ግርመት ክምሰል ልትአየሰ እግል ንፍሀም እንቀድር፡ ክልኩም ከባቢ ለግሩም ሐፊኩም፡፡ ምናተ፡ ለዘት ናይለ ቡን እት ክሉ ሐቲ ተ፡፡ ለምህመት ህዬ ጽባጥ ወለዘት ናይለ ቡን እንድኢኮን ዲብ ሸሓንመ ምን



አጥዐሚቶ

ጅነ - ይመ አቡዬ እሊ ረአሱ እግልሚ ትበርሐ?
እም - ሕልብዬ ወድራርዬ አቡኩም ክልዶል እብኩም ሰበት ለሐሰብ ተ ክእነ ረአሱ ምልሆይ ጋብእ ለህለ፡፡
ጅነ - እለ ምን ገብእ ይመ፡ እንቲ፡ እንቲ፡ እብነ ሰበት ኢትትሐሰራቱ እሊ ረአሰኪ ረዩም ጭገሩ ሸልሸላይ ለገብእ

ምስል አዳም እግል ትተሳኒ ለሰዴ ነባዬሕ ይልከርኪ

ወድ-አዳም ምስል ለነብር መጅተመሶ ተ፡፡ ዲብ አምሳይ መንበረቱ ህዬ እንዴ ልትሳዴ ነብር፡፡ ወቀዩ እግል ልትሰርገል ወመንበረቱ እግል ትሰኔ ልትጋሚ፡ ልትፋህም፡ ልትሓሚ፡ አድሕድ ለሐምድ፡ ሀይብ ወነሰእ ወዶል ዶል ህዬ እብ እኪት አድሕድ ነክእ፡፡ ምርት ነፈር ምስልክ ሸቄ ሐቀ ገብእ ወእንተ ወህቲ መታሊት ሐቀ ገብእኩም፡ ምን ሰኔት እንዴ ትሸንክ ዲብ አከይ-ዋይዲብ ሐቀ ትብገስከ ሰለል ራትዐት እግል ተአጽብጡ ዋጅብ ተ፡፡ ከአዳም ዲብ ገበይክ እግል ተአትዩ ሚ እግል ትውዴ ወጅብ፡፡ እብ ክሰሰ እሊ ለእመር ኬትባይ አክትብት ሳይትሉጂ ላቲ ዴልካርኪ እለን ለተልዩ ልብል፡፡

ከለጥ ህሌክ ኢቲበሉ፡፡ እሰልፍ ሐምዱ፡ ቅድረቱ ክምሰል ወደ አፍሀሙ ሐቀሁ ረአይክ ተሀይቡ፡፡
□ እንተ ኖሰክ ለንምያይ ካልጥ ሐቀ ህሌክ እሰልፍ እብ ከለጥክ እመን፡ ሐቀሁ እግሉ ሰዬሕ
□ ሕኔት እብ ቀጽብ ወእብ ተሀዲድ እብ ሰኔት ወምልህዮት አንብት፡፡
□ ሕኔት እብ ረአይክ ተአነብት፡ እሰልፍ እብ ሰኡል አንብት፡፡ “ክእነ ውዴክ ምንዲ ትገብእ ከአፎ መሰለክ፡ እለ ምንዲ ነኦዘም ምነ ወይሐሰ ገብእ፡” ዲብ ትብል አንብት፡፡
□ ልእግሉ ትሰኡሉ ሰኡላት ህቲ ለበልሱ እግል ልግበእ ህለ እግሉ፡፡
□ እንተ ሕኔት ትትሃጌ ዝያደት እግሉ በክት ሀብ፡ ምን ሕኔት መትሃግያይ ዝያደት ሴምዓይ ምን ትገብእ ለሐይሱ፡፡
□ ለነፈር ለፍክረት ናዩ ክምሰል ትገብእ ውዴ፡፡ ሕኔት እብ ፍክረትክ ትገይሰ ናይ ሕበር እግል ትውደዩ ጀርባ፡፡
□ ላጋሪት እብ ዕን ናይለ ነፈር እግል ትርአዩ ጀርባ፡፡ ሕኔት ናይ ኖሰክ ተሕሊል እሰልፍ ናዩ ረአይ እሰልፍ ሰመሶ፡፡
□ እግለ ነፈር ረሕመት ወምልህዮት አርእዩ፡፡ ክእነ ወዴክ ምን ገብእ ለነፈር እግል ልትቀየር ቀድር፡፡

በህል ምልህዮት ወምስንዮት

- መሳኒት ዕንታትን እግል ንፍተሕ ወዲብ ቀበትን ለህሌት ቅድረት እግል ንበርብር ባብ ፍትሐ እግል፡፡
- መሳኒት ዲብ ጀራዲን ለህለው ዕንባባታት ቶም፡፡ እብ አማነት ለበቅሉ፡ እብ ሰሓቅ ወለውቀት ለለዐንብሮ፡ እብ ሻም ወረሕመት ለነብር ክልቀት ቶም፡፡
- ምስንዮት እግል ሐያት ጣፍሐት ወባርህት ወድዮ!
- ምስንዮት ምን ጽልመት በርህት ወምን ዐዛብ ረህየት ተ፡፡
- መሰኒ ሐያትን መሳልል ፈጊር ሰጋደት ዶል ተሐዜ ለንተንከብ እቲ ጸገት ተ፡፡
- መሰኒ ዴማት ሰሓቅ ወለውቀት ለገብእ እግልን ዴማት ወርዘቅ ተ፡፡
- መሰኒ ሐያትን እብ ግርመት፡ ርዘቅ፡ ለውቀት ወመሕበር ለመልእ እግልን ንዕመት ተ፡፡
- መሰኒ እለ ለእነብር እተ ዐለም ጣፍሐት ወርዘቅ ለወድዮ እግልን ዴጸት ተ፡፡
- መሰኒ አለቡ ከልብ ድምነት ተ፡፡ በኑ ነብሕ ወጀር ልብሉ አለቡ፡፡
- መሰኒ እግል ትብኔት ሰኒን ወመሰኒ እግል ትትፈንቴ ለቅወት ሰኒ ሐጨር፡፡ ምናተ ትዕሰ ናይለ ፍንቲት ገህረት እት ኩብድ ዕቅርት ተ፡፡
- መሳኒት ሰንያም እግለ ምን ደሚርን ለበደዩ ምህም ላተን ጋራት ሰሓቅ፡ ሰእዮት፡ መዕነውዮት ወኤማን እግል ለአቅብላን ለከድሞ ሰብ አማነት ቶም፡፡

ጠቢዐት ወድ አዳም ምስል ኖሶ ደሙ ዶል ትትቃረን

አዳም አርበዕ ጅንሰ ደም ክምሰል ህለ እግሉ ልትአመር፡፡ ህዮም ህዬ፡ ዐ, A, B, AB ቶም፡፡ ምን Face Reading ለልብል ክቲብ ለረከብናሁ፡፡ ጠቢዐት ወድ-አዳም ምስል ኖሶ ናይ ደም መትጻባጥ ህለ እግሉ፡፡ እብ አሳሰለ ክቲብ ጠባይዕ አዳም ምስል ጅንሰ ደሙ ዲብ ልትቃረን እሊ ለተሌ ጠባይዕ ልትርኡ ልብል፡፡
○ - ጅንሰ ደሙ ○ ላቲ ነፈር እሉም ለተሉ ጠባይዕ ህለው እግሉ፡፡
• መብዝሐ ዶል ሚርሓይ ፋሬሕ ተ፡፡
• ብዝሓም ቴልዮት ወመሳኒት እግል ለህሉ እግሉ ከድም፡ ሕኔት እት ሚርሐት እት ምስንዮት ልትደለል፡፡
• ጸጋይ ወርሐም ተ፡፡ ምነ እለ መልክ እግል ለሀብ ወልካፍል ለሐዜ ወሰኔት ፈቲ፡፡
• እብ አዳም ፍቲይ ተ፡፡ እግል ተቅዩር ልትከበት ወመትቀዳም ፈቲ፡፡
• እብ ህግዩ ብዕዳም ተአሰር ገብእ እቲ፡ በህለት ህግዩ ብዕዳም ሰምዕ ወዲብ ተልፍዝዮን እግል ልትርኡ ፈቲ፡፡
• እሊ ነፈር እሊ እብ ዓመት አሚን ተ፡፡ ምናተ ሐት-ሐቲ ዶል እብ ሰብብ ኢተርኪዝ አክላጣት ወዴ፡፡

መዕሉማት እብ ክቡሰከዋክብ

ክዋክብ፡ ዲብ ዐርሽ ለልትረከብ በርህት ለለለዩብ ክልቀት ተ፡፡ ሐቲ ምን እሊ ጸሓይ ተ፡፡ እሊ ከዋክብ እሊ ገሌሁ ነኦይሽ፡ ገሌሁ ዐባዩ፡ ገሌሁ በርህት ዛይደት ለለሀይብ ወገሌሁ ጣንሽ ተ፡፡ ሰሩ ገሌ ከዋክብ ዐደድ ለእግለ ረዩም ህሉ፡ ለበርህቲ እት ምድር እግል ትብጸሕ ሚልዮናት ሰናታት ነሰእ ምነ፡፡ ሕነ ሐዳይ እንዴ ለአንጨዋርሕ ሌጠ እንርኤ፡ ምናተ፡ ዲብ ዐርሽ ለህለ ከዋክብ ብዝሐሁ ትርልዮናት ገብእ፡፡ ደረጃት ሐፋነት ከዋክብ እበ እግሉ ቦም ሕብር ክምሰል ትትሐደድ ዑለመ ዐርሽ ሸርሐ፡፡ ሰበት እሊ፡
• ሕብር ቤጨ/አሰፈር ለም ከዋክብ ደረጃት ሐፋነቶም ሐድ 6000 ዲግሪ ሰንቲ ግሬድ ትገብእ፡፡
• ሕብር ቀዬሕ ለም ከዋክብ ደረጃት ሐፋነቶም 3000 ዲግሪ ሰንቲግሬድ ትበጽሕ፡፡
• ሕብር ሊኒ ለም ከዋክብ ዲብ ዐርሽ ለሐፍነው እት ገብእ፡ ደረጃት ሐፋነቶም ሐድ 30,000 ዲግሪ ሰንቲግሬድ ትገብእ፡፡

“ፍቲ ጀላብ እግል ነኡውርስ፡ ዐፎ ብህላም ህሌነ”

ዐይለት መርሐም ብቅት አመተ ኢተአመረት ተ። ምዶል ወእተዩ ክምሰል ሳድፍመ እመር ኢነን። ዲመ መደጋግ ዛይድ ጠልብ። ብቅት ለትሰብሶ ናይ ገርብ ወዐቅል ደረርመ ክቡድ ተ። ሞት ሳደፊት ምንገብእመ፡ ለልትክለቅ ሐዘን ወይትምን እብ መጀቡ ዘይድ። ለቀድሞት እብ ሰላም፡ ዕሪት ወዐፎ ኢሰክበት ምንገብእ ህይ፡ ፍንጌ ዐይለት ማይት ወቃትል ለኢተሐዘ ድምለ ወከራህየት ልትክለቅ።

ዲብ መጅተመዕ ኤረትርፍ፡ ብዙሕ ቅያስ ለአለቡ ቅየም ክምሰል ህለ ክሊነ ለነኡምረ ኦማን ተ። እሊ ቅያስ ለአለቡ ቅየም ዲብ ኦማም ጀላብ እግል ልትዐዲ ህይ መስኡልየት ክሊነ ገብእ። ምር ምን እሎም ህይ እግል ግርመት ወሽረፍ መጅተመዕ እንዲ ወደሐው ለለክራ ሰዋል፡ ብቅት እተ ትሳድፍ እቲ ናይ ሞት ኦማቡይ ዐፎ ወዕሪት ተ። እንዲ አትሌነ በገ፡ ለእግል እሊ ቃሊ ዐዋዲ እሊ እት ፍዕል ለለውዑሉ ተኣምርተ ሕሽመቶም ወቀሎቶም ሰበት ቱ አተላሉም እግል ብሂል፡ እብ ምራድ ኖስ መፋህመት ዓይላት ማይት እብ ሕሽምት ገበይ ዕሬ ወዐፎ ናይ ለሰክበት ብቅት ሞት ለሰበበ እግል ነኡተላሌ እኩም።

ለናይ ሞት ብቅት፡ ዲብ ድዋራት እምበደርሆ ዲብ ዮም 5 ጁላይ 2026 ሳዕት 5፡30 ምሴ ሳደፊ። ሰዋግ መኪነት አሰይድ መሐመድሐሰን ሓምድ - ምን መዋሊድ አፍዐበት (ናፎ) ህይ፡ እብ ዐጀለት ልትሐረክ ለዐለ ሻብ በረከት ተክላይ እብ መኪነት እንዲ ዘብጠ ዲብ ሞት ለኡብጸሐት ብቅት ሰበበ። አሰይድ መሐመድሐሰን ሓምድ፡ ለብቅት ክምሰል ሳደፊት፡ እግል በረከት እብ ሽፋግቲ አስክ እስብዳልየት አሮተ ለነሰአይ፡ ሻብ በረከት ህይ፡ ሐቲ ሳምን ዲብ እስብዳልየት ዲብ ልትዳዌ ሐቀለ ጸንሐ ሰበት ትወፊ፡ ዲብ ዮም 12 ጁላይ፡ ዋልዲ፡ አቃርቡ ወመትዓቢቲ ዲብ ሐድረው እቲ፡ ዲብ አርበዕቲ አሰመራ፡ መቅበረት ቤት ክስታን ቅዱስ ገዮርጊስ፡ እብ ሕሽመት ዐባይ ትቀበረ።

እግል እሊ ለጀሬት ብቅት እግል አሰክቦት፡ እብ ክልኢቶም ዓይላት ለለትሐዘ መፋህመት ክምሰል ገብእት ህይ፡ ዲብ ዮም 23 ጁላይ 2026፡ ፍንጌ እሊን ክልኢ ዐይለት ናይ ዕሬ ገዛም ገብእ። ዲብ ናይ ዕሬ ዕለት፡ ብቅት ለአጅረ አሰይድ መሐመድሐሰን ሓምድ፡ ዋልዲ፡ ወኣቃርቡ፡ ሚርሐት ደያናት ወዕጋል እንዲ አምረሓቲ ምን አፍዐበት ዲብ ቀደም ዐይለት መርሐም ሻብ በረከት ተክላይ ለቀርቡ፡ ዐይለት ናይለ ብቅት ለወደ፡ መትሃማየት

ትግራይት ሰበት ገብአው ህይ፡ ሱሕሬ ስሌማን ዑሰማን ዐቤ እብ ትግርኛ ዲብ ተርጅም እሎም፡ ክልኢቶም ዓይላት ገዛም ዕሬ ክምሰል ወዱ ገብእ።

ለናይ ዕሬ በርናምጅ እብ ጸሎት (ደዐ) ለክስተ ቀሽ ቴድሮስ ደጀን እት ገብእ፡ እንዲ ትዋዕደው መትዋጀሆቶም እግል ካልቅ ሐቀለ ሐመድ፡ ዐይለት ማይት፡ እግል ዲብ ምድር ልግበእ ወሰመ፡ ወሰፍ ለአለቡ ዐፎ ወዕሬ ሐሪሆም፡ ተኣምርተ ሳብተት እምነቶም እብ ደረጀት ደውለት ለልሽረሕ መሰል ሰኔት ላቲ ቅዱስ መዋዲቶም ክምቲ ሐበረው። ኤረትርፍን ህይ ውላድ ሐቲ ደውለት ወውላድ ምር ገበል ሰበት ሕነ፡ እስሌማይ ወክስቲናይ እንዲ ይእንብል፡ እግል ሳድፊን መሻክል እብ ክእን እበ ውሕደትን ለትነውር ጋምለት ፍቲ ለዐመት እቲ ኦግቡይ እግል ነኡክበት ምን ቀደር፡ ፈርሐት ዛይደት ወናይ ደሚር ገናዐት ክምሰል ልትሰመዖም ሸርሐው።

አሰልፍ እግል ገብእት ዓደት አው ገዛም ዕሪት እንዲ አሸረው ከሊመቶም ለአሰመዐው አብ ማይት አሰይድ



አሰይድ መሐመድ ሓሰን ሓምድ (መብቅያይ)

ልቡ ለትበገሰት ሐምዲሁ ቀደመ እሎም።

ሐው አብ ማይት አሰይድ ፋኑስ መሐረዝጊ እብ ተረቲ፡ “ሻብ በረከት ወአሰይድ መሐመድሐሰን ሓምድ እግል ክልኢቶም ለትፈንቲ ለኢትትብተክ አምዕልተ ለሳደፊቶም። ሰበት እሊ፡ ፈንጎሕ ፈጅር ሕናመ ሚ እግል ልሳድፊ ክምቲ ሰበት ኢነኡምር፡ እብ ጀህትን ዕፋያምኩም ህሌነ” ቤለ።

“ብቅት አመተ ኢተአመረት ተ። ምናተ እብ ረቢ እግል ንትዐደየ ሰበት ይእንቀድር፡ ወልናቲ እብ ብቅት ማይት ምኒ ለህለ። አዜ ህይ፡ ብልዐት ድየት ዓዳትን ወእምነትን ሰበት ኢነን፡ ፍቲ ወዐፎ እግል ኒዲ ቲ ለቀረር። ሰበበ፡ እምነትን አበውን ለአጸንሐወ እግልን ቃሊ ዓዳት፡ ዐፎ ሰበት ገብእ። እሊ ህይ፡ እብ ዶልዶሉ ለለክፈረሐቲ፡ ሸዐብ ወሕኩመት ለለክደዱ፡ ዝያደት ክሉ ህይ ረቢ ለፊትዩ ሰኔ ውዳይ ሰበት ገብእ፡ እግል ዐፎ ሐሊት ለህቤነ ካልቅ ሐምድ” ለቤለው ህይ፡ አቃርብ ማይት አሰይድ ሐድጉ ገብረትንሳኢ ቶም።

ቀሽ ዳንኤል ኪርስ (አብ ስምሐ ዐይለት አሰይድ ተክላይ ተክስቲ)፡ ቀሽ ሄኖክ ወልደፊሊጸስ አቃርብ ማይት፡ ክምሰልሁመ ቀሽ ቴድሮስ ህይሌ አቃርብ ማይት እብ ጀህቲ፡ እግል ዕሬ ወዐፎ ለሸፊሕ ሐምዲ ለተኣስትህሉ አፍካር ሐቀለ ፈሰረ፡ “እብ ሰብብል ዲብ ረአሰ ሐነ በረከት ለሳደፊት አመተ ኢተአመረት ሞት ለሰበበ ብቅት ምን ቅያስ ወለዐል ሐዘን። ምናተ፡ ለሐደስ ክምሰል ሳደፊ፡ እንዲ ተኣክብነ ወትፋህም፡ እግል ቅድሞት እብ ዐፎ ወዕሬ እግል ነኡትምም ምን ቀደር፡ ምን ቅያስ ወለዐል ለልኡትዐጅብ ተ። ዐፎ ወዕሬ ህይ፡ ረቢ ወኡዳም ለፊትዩ፡ አዳም ህይ ተኣምርቲ ግርመቲ ወሰሰቲ ሰበት ገብእት፡ እሊ ንስእት ለህሌት በዳሪት እግል ኩሉ መሰል ሰኔት ተ። አዜመ፡ እግል ዐገቤክ ዐፎ ብሂል ምን ረቢ ለጸንሐነ ተኣምርታ ልባብ ወፍቲ ክምቲ፡ እግል እሊ ሕሹም ወሸሪፍ ዓዳትን እግል ንሕፊዙ ወዲብለ መጽእ ታርፊን እግል ነዐደዩ ወእግል ንታለዩ እብለ መናሰበት እሊ አትፋቅድ” ቤለው።

ዋልዲይት ማይት አሰይድ አስክሉ በርሄ እብ ተረቲ፡ “በረከት ወልዩ ርሐም ወፊታይ ክሉቲ ለዐለ። ሐቆ ዐስር ሰነት እግል ልርኤነ ምን ብሪጣንዩ መጸ። እብ ክእን ምንእን መትፈንታዩ ህይ፡ መሪር ገህይ ልትሰመዐ። እብ ረቢ ለትገብእ ህይ እግል ትትዐደየ ኢትቀድር። ዲብ ደንገበ ላኪን፡ ክሊን ዋልዲን ወኣቃርብ እግል እሊ ቀድሞት ዐፎ ወዕሪት እግል ነኡትምም

ምን ቀደር፡ ገማነ ለለክሰክብ ተ። ዐፎ ህይ ልትመጣውሩ ሰበት አለቡ፡ ዲብለ ዋልዲን ለቤለው ለእወሰክ አው ለኣነቅሰ አለብዬ። እግል በረከት ወልዩ ረቢ ጀነት ወረሕመት ለሀቡ፡ እግል ክለ ዐይለትን ህይ ረቢ ኤማን ወሰብር ለሀቡን” ዲብ ትብል ህግያህ አትመመት።

እብ ዐይለት መርሐም ካፊ ናይ ዐፎ ወዕሬ ከሊማት ክምሰል ቀርቡ፡ እብ ጀህት መትኩብተት ዕሬ ወዐፎ ላቶም ዐይለትለ ብቅት ለአጅረ እሊ ለተሌ ናይ ሐምዲ ከሊማት ትቀደመ። እግል ገሌ ምን ህግያህም ለቀደመው ህይ፡ እብ ክእን ለተሌ ጭምም እንዲ አበልን ነኡቀርብ እግልኩም።

እበ ገብእት ዓደት ዕሬ፡ አሰልፍ ለትሰመዐዩ ናይ ደሚር ገናዐት ከሊመቲ ለቀደመ ምን ዐይለት ናይለ ብቅት ለወደ ከንቲባይ መሕመድ መሐመድ ተ። ከንቲባት መሕመድ መሐመድ፡ “አዳም እብ ሰላዲ እንዲ ኢገብእ እብ ሰላም፡ እብ ፍቲ፡ እብ ዐፎቲ ለልተመን። እንቲም ህይ እንዲ ሐሰብኩም ወትጋሚኩም፡ ተኣምርተ እምነትኩም ላቲ ዐፎ ሐሪኩም፡ ፈክኩም ምን ረቢ ትፈደደደ። ዋድያመ፡ ለህሌኩም ለልትሐመድ ውዳይ ህይ፡ ዲመ ወሰፍ ሕሽመትኩም ወእምነትኩም እት ገብእ፡ እግል አጅያል ዲብ ልትህደግ እግል ልንበር ቲ” ቤለ።

ምን ጀህት ናይለ ብቅት ለአጅረ ሓጅ ዐሊ መሐመድኑር ዐሊ ህይ፡ “መትዓራይ ኢነን እግል ጀሪመት ለወደ፡ እግል ሴምዓይ ኖሱ እንዲ ኢተርፍቲ ፈረሕ ወሰናር ለክልቅ፡ ረቢመ ለልትዓፊው ወለልትዓፊውቲ ለፊቲ። ሰበት እሊ፡ ረቢ ለቤለዩ ሰበት ወዳኩም፡ ክሉ ምን ረቢ ርኮቡ። ሰኔት ለወዳ ህይ ሰኔት ልትፈዴ። ዋድያመ፡ እግልን ለህሌኩም ዐፎ ወዕሬ ህይ፡ ኩሉ እግል ልትለዩ ለወጅብ መሰል ሰኔት ሰበት ገብእ፡ እብኩም ሕቡናም ሕነ” ዲብ ልብል እግል ክለ ዐይለት መርሐም ኤማን ወሰብር ተምነ።

እንዲ ተለ ሓጅ መሐመድዐሊ ሺክ ሕሲን፡ “ብቅት እብ አመተ ኢተአመረት ሰበት መጽእ፡ እበ ኢተሐሰበ ሐደስ ምን ቅያስ ወለዐል ግሄ። ላኪን ለንሰት ሬሕ ለኢተኣቀበል ገብእት እትነ። ረቢ ላኪን ዲብኩም ዲብ ርሐማም ወፊታያም ዐፎ ለትብል ዐይለት ሰበት ወደቅ፡ ራሐት ደሚር ትሰመዐተ። ናይናተ እግል ኒዲ ዲበ አቅበልናኩም እተ ኢነት፡ እግል ሱዱፍኩም ለዐለ ሐዘን መሪር እንዲ ከህልኩም እብ ንሳል ሞዑም ወፍዕል ሰኔ ትከበትኩ። እብ ኤማን ህይ ንሐምደኩም። እግል እሊ፡ ሕውትነት እግል ንትክል እቲ ወፍቲ



መርሐም በረከት ተክላይ

እግል ንዘረእ እቲ እተም። ‘ምንኩም ለነሐዘዩ ሸእ ህለ ምንገብእ፡ ለነሐዘዩ ፍቲ ወሰላምተ’ ቲልኩ። ለቀድሞት እብ ዕሬ ወዐፎ ታምም ምን አተመምኩመ ህይ፡ ተኣምርተ ሕሽመትኩም ወለሸሪፍ ዓዳትኩም ሰበት ገብእ፡ ዲመ ዲብ ትዘከር ክምሰል ነብር እግል ሊዴኩም ተ። ዋድያመ እግልን ለህሌኩም ዐፎ ህይ፡ እግል ወጠን ወሸዐብ መሰል ሰኔት፡ ክል ምዋጥንመ እግል ልተበዑ ለቡ ቃሊ ኤርትርያይ ዐዋዲ ሰበት ገብእ፡ እብ ምድር ወሰመ ምን ረቢ ርኮቡ። እግል መርሐም ወልነ ሻብ በረከት ተክላይ ረቢ ጀነት ወረሕመት ለሀቡ” ቤለው።

ብቅት ለወደ አሰይድ መሐመድሐሰን ሓምድ እብ ጀህቲ፡ ፈድለ ዲብ ክለ ሐያቲ ለኢልትረሰበ ለገብእት እሉ ዐፎቲ እሊ ለተሌ ከሊመት ተሃገ፡ “ምሰል በረከት ለሳደፊን ሸእ ክቡድ ተ። አዜ ህይ ዐይለቲ ለቀድሞት እብ ዐፎ እንዲ አትመመው ሰበት ዐፊውኒ ምን ቅያስ ወለዐል ሐምዶም። ራሐት ደሚር ህይ ትሰመዐተኒ። ፊኩም ምን ረቢ ልትፈደደደ። ዲብ ሰኔቶም ህይ ለውዕለኒ” ዲብ ልብል ሐምዲሁ ቀደመ።

ዲብ ደንገበ፡ መዲር ምዴርየት አፍዐበት አሰይድ አሕመድ መሐመድኑር ረጀቲ፡ ዲበ መናሰበት እንዲ ሐድረ ዲበ ቀደመዩ ከሊመት፡ እሊ እብ ዐይለት አሰይድ ተክላይ ተክስቲ፡ ዲብ ረአሰለ ብቅት ለወደ አሰይድ መሐመድሐሰን ሓምድ ወዐይለቲ ጋብእ ለህለ ዐፎ ወዕሬ፡ እበ ምር ተኣምርተ ሕሹም ዐዋዲን ወቅደምን ክምቲ፡ እበ ካልእ ህይ፡ እሰላምን ንግበእ ወክስታ፡ ፍንጌን ውሕደት ትርድት ወሰን ክምሰል ህለ፡ እሊ ናይ ዮም ለሳደፊ መቅርሕ ሰመዕ በሲር ሰበት ገብእ፡ እግል እሊ ሕሹም ዐዋዲን እግል ንሕፊዙ ወዲብለ ተሌ ታርፊን እግል ነኡተላልፋ ትፋነ።

ናይ ዕሪት ዓደት ክምሰል ገብእት፡ ክልኢቶም ዐይላት፡ እግል ዳሌት እሎም ነብረ እብ ሕበር ክምሰል በልዐው ወሰተው፡ ክምሰል ተኣምርተ ፍቲሆምም ቀሽ ቴድሮስ ደጀን ወሓጅ ዐሊ መሐመድኬር ዐሊ እብ ሕበር ቅጩ እንዲ ካፈለው፡ ቡናም ወሻሂሆም እንዲ ሰተው እግል ናይ ዕሬ ወዐፎ አምዕል አትመመው።


ዲማት፡ ጀሪደት ሓዳስ ኤርትራ 35ይት ሰነት ዕልብ 291



ዐይለት መርሐም



ዐይለት መብቅያይ



ማጅሮ ወናዝሬት፡ ዕዉታም ወጠንያይ ሰዐይ ሰር-መራቶን ገኘው

ሰዐይ፡ ክብሮም ጸሃዬ

ወጠንያይ ጅግረ ሰር መራቶን ውላድ ወአዋልድ ሰነት 2026፡ ለሐልፈት ሰንበት-ዐባይ 9 አጎስት እት አቅሊም ግብለት መዲነት መንደራረ ገብኤ።

እትሊ ሰዐይ ረያም መሳፈት ሰለስ አቅሊም ግብለት፡ ጋሽበርክ ወምግብ፡ ክምሰልሁመ ናዲ ደንደን ምን ውሳኔት ድፊ ለወክለው፡ ክምሰልሁመ ገሌ ናይ ብሕቶት መትጃግረት መራቶን ሻረከው። አቃሊም ዐንሰቡ ቅብለት ወምብለት በሐር ቀየሕ ላኪን ኢሻረከው።

እት ናይ 21 ኪሎምትር ሰዐይ፡ ሐቲ ክለት 5.25 ኪሎምትር ሰበት

ኢሊህርሶ ሰበት ኢቀድረ ትሸነክ።

ማርሓይት መጅሙዐት እብ አትሌታት አቅሊም ግብለት ወናዲ ደንደን ትትዋሌ እት ለዐለት ዲበ ኢነት፡ ደዓም ዲብ ባርንቶ ዕዉት እሊ ጅግረ ለገኦ ወዲብ አቅሊሙ ስሜቱ ዲበ እት ለሓፍዝ ልሂርር ለሀለ ዐወት ሁብቲ፡ ዝያድ እት ለአወቄ ትረኣ።

ሕዱዳም አትሌታት ምስል እት ናይ ቲማዋ ከዋ እት ልሸኦን አክለ መጽአው ህዬ፡ አትሌት አቅሊም ግብለት ማጅር ቴድሮሴ፡ እበ አርአየ ማምብየ ሰዐይ ሻፍግ፡ እብ 140ት፡ 4ደቂቀት ወ41 ካልኢት፡ ዕዉት 'ጅግረ ሰር መራቶን ሰነት 2026' ገብኤ። ወድ ፈሪቄ ተክሊህይማኖት ብርሃኔ፡ ምኑ እብ ክልኤ ካልኢት

አዋልድ ለልአሰፍ ሕዱሁ እት አነት እት እንቲ፡ ጃዝባይ ጅግረ ዐለ።

እት ሰዐይ አዋልድ፡ ናዲ ደንደን እትሊ ጅግረ እዳ ለዓለት ምንመ ተዐሌ እግለን፡ ዐውቲ ላኪን አሰክለ ሐቲ ቄድራይት አትሌት ለአሻረክ ጋሽበርክ ቱ ለትደለላ። ኢሊምፒካይት አትሌት ናዝሬት ወልዱ እብ 14፡ 19ደ፡ ወ1ካልኢት ሰልፋይት ኦቲት። ናዝሬት እት ወሬሕ ማርስ እት ሰዐይ ምን ተአቀብል ወእንዜ፡ አሰክ እል እት ቀበት ዐድ እት ወዳቱ ጅግራታት እብ እዳ ዛይደት እብህዝት ህሉት።

ሚካል ጸገዝኣብ ወኢሊምፒካይት አትሌት ዶልሹ ተሰፋ ምን ደንደን፡ ክልኤ ወአርበዕ ካልኢት እንዳ አከረየ ደርብ ናዝሬት፡ ካልኤ ወሳልስ ደረጃት ጸብጠዩ። ናይ ግብለት አትሌት ናጽነት አማንኤል፡ ደዓም ካልኤ ወሳልስ ደረጃት ለረክበዩ ዮርዳኖስ ሁብቲሰላሴ ምን ናዲ ደንደን ወትርሓስ ሚክኤል ምን ናዲ አቅሊም ግብለት፡ ምን ራብዓይት አሰክ ሳድስ ደረጃት አተዩ። እትሊ ክልኢቲ ጅግራታት፡ አቅሊም ምግብ፡ እት ደረጃት ይአተ። እት ምስል እሊ ለገይስ ጅግራታት ሐምስ ኪሎምትር ወ1.6 ኪሎምትር ላኪን እብ እዳ ለዓለት አሸብረቀ።

እት ናይ ሐምስ ኪሎምትር ህዬ፡ አትሌታት አቅሊም ምግብ ኢዮቤል ዘርኢት፡ ሳይሞን ተሰፋገርጊስ ወፋንኤል መሓሪ ደርብ-አድሕድ ተዐወተው። ኢዮቤል፡ እብ 14 ደቂቀት፡14 ካልኢት ወሰለስ ካልኢት ንኢሽ እት ልትዐወት፡ ሳይሞን ወፋንኤል፡ እብ ሐቲ ወክልኤ ካልኢት ንኢሽ ደርብ ለአተው ወአክሉ ለኬደው ቶም።

እት ነፍስ መሳፈት ጅግረ አዋልድ፡ ምን አቅሊም ምግብ ድያና ሸሻይ - እብ 16 ደቀት ወ43 ካልኢት ተዐወተው። ወለት ፈሪቀ አሰቲር ይባቤ ህዬ፡ 17 ካልኢት እንዳ ደንገረት ደዓም ለጸብጠቲ ተርቲብ ካልኢይት ደረጃት ደግመት። ቅሳነት ተወልዴብርሃን ምን ናዲ ደንደን ህዬ፡ 22 ካልኢት እንዳ ደንገረት መዳልየት ነሓስ ትሰርጌት።

እምበል እሊም እት ምህለት ለኢሊህይብ ሻፍግ ሰዐይ 1.6 ኪሎምትር ጅግረ፡ ፍጹም አብርሃም ምን ግብለት እብ 4 ደቂቀት ወ4 ካልኢት አወላይ አተ። ፍትሓዊ ዛይድ ወዳብራ ናሰር ምን ናዲ ሰዐይ አቅሊም ምግብ ደርብ ለአተው ገኦው።

ነፍሪ ተክሊማርያም ምን ምግብ ህዬ፡ እብ 4 ደቂቀት ወ46 ካልኢት ዲብ ትትዐወት፡ እልልታ ሚክኤል ምን ናዲ ደንደን ወልዋም አንገሎም ምን ናዲ ግብለት፡ አሰረ ለተለያ ተን። እንትብህ ለልአትሐዝዩ ጋር ላኪን ቅያብ ናይ ሰልሳቲ አቃሊም ዐንሰቡ ግብለት ወቅብለት በሐር ቀየሕ ሰኖታት ብዙሕ ሰበት ትደጋገሙ መጋድፁ እንዳ ትፈረገ ዲብ ጅግረ ክም ለአቀብሎ ወአትሌታት ፈዳብያም ለልአፈሩ እበ ገበይ ምን ትትቀፈር እሎም፡ መክሰብ ዐቢ ቲ።



ናዝሬት (ምግባይት)፡ ምስል ሚካል (ድገለብ) ወዶልሺ (ድማን)



ዕዉት ሰር መራቶን ማጅር (ምግባይ) ምስል ተክሊህይማኖት (ድገለብ) ወሳይሞን (ድማን)

ክቅኪም ምግብ፡ ናይ ከረም ጅግራታት ሾኪቦፍ ከክነብት

እብ መግወነት ፈሬዕ ርያደት ወፈደሬሽን ሾሊቦል አቅሊም ምግብ ለትነዝመ ጅግራታት ሸክል (ግራሱሩት) ለሐልፈት ሰንበት ንኢሽ ፈተች ርያደት እት ሐድረወ መናሰበት እት ሚዳን ቦችዮፊላ አንበተ።

እሊ እብ ደረጃት ምግብ እት ክልኤ እንዳ ትክፈሉ፡ ለትፈናተዩ ምዴርያት እብ ውላድ ወአዋልድ ለአሻርክ ለሀለ ጅግራታት ከረም፡ እት ሐልፈ ሰነብት እለ ተሌ ፍገሪት እስጅላ ህሉ።

እት ምግብ 14 ወ15 ምን ውላድ አክርየ እግል ዐዳገ-ሐሙሴ ጋላ-ነፍሐ እግል አሳሻውል ወንዳይፍ እግል በሪኽ ሕድ እበ ትመስል ፍገሪት 2-0 እት ቀለብም፡ እት ምግብ 16 ወ17 ሰነት ምን አዋልድ፡ አርበዕቲ አሰመረ እግል ዐዳገ-ሐሙሴ 2-0፡ እት ክምሰልሁመ ውላድ ማይ-ተመናይ እግል በሪኽ 2-0 እት ሳርሕዎም፡ ለውጅህት ትልህየ ትረኡት ዲበ መናሰበት ለፍንጌ ምዴርያት አሳሻውል ወአክርየ ለገኦት እት ገብኤ፡ እብ ዐውቲ አሳሻውል 2-1 ተ'መት።

እሊ ጅግራታት ዮም አርብዕመ ምን ሳዐት 8:00 አሰቡሕ እንዳ አንበተ ምግብ 16 ወ17 ሰነት ለልአሻርክ ትልህየታት ለአተላሌ ውዕል ቲ። አዋልድ አክርየ ምስል ጋላ-ነፍሐ፡ በሪኽ ምስል ማይ-ተመናይ፡ ወውላድ ህዬ አክርየ ምስል ማይ-ተመናይ እግል ልተልሀው ቲ።



ዐለት፡ አትሌታት ምን ምውፋር አተባሳት አሰክ ሆቲል መረብ እት ህሉት ጽርግያ ቶም አርበዕ ኢነት ለአትቃበለው።

እትሊ እብ ዝላም ከረም ሸዋሬዕ መንደራረ ሻትር እቲ ለሀለ ሒን፡ ስሙያም ወዲብ ደረጃት-ውቅል እግል ልብጽሐ ልትጋደሎ ለሀለው አትሌታት ሐዳይስ ምን ውላድ፡ እብ ለትወቀለት ሸፋገት ጅግራሆም አንበተው። ምን ጽባብሐም ብዝሓም አትሌታት እት ልታረፎ ትረኣው። ዎሮት ምን ስሙያም አትሌታት ላቲ ወደዓም 3ይ ደረጃት አቲ ለዐለ አሮን ክፍሉ፡ ጅግረ ሰር ምኑ እንዳ

እንዳ ደንገረ ካልኢይ ዲብ ለአቲ፡ ናይ ናዲ ደንደን አትሌታት ሳይሞን መብራህቲ ወሙሴ ክፍሎም፡ ሰለስ ካልኢት እንዳ አከረው ምኑ፡ ሳልሳይ ወራብዓይ ተርቲብ ያረው።

እምበል እሊም፡ መገሰ ሸማይ ምን ግብለት 21 ካልኢት፡ ወመርሃዊ ከሰቲ ምን አቅሊም ጋሽበርክ 26 ካልኢት እንዳ ትደንገረው ሓምስ ወሳድስ ተርቲብ ረክበው። መትሐድራይ እሊ ጅግረ አቅሊም ግብለት ህዬ፡ ደዓም እብ ዐወት ሁብቲ ለረክበዩ ዐውቲ፡ ዮም ዓመትመ እብ ማጅር ቴድሮስ ዳግሙ ህሉ። ክል-ዶል እብ ሰብብ ሕዳን መትጃግረት ለልአትሃጌ ጅግረ


እብ ሰብላ እሰራኤል እት ቅጣዕ ቐዝ ትወድዩ ለህሌት ወራራት እብ ኣላፍ ለልትዐለዎ ውላድ-ፈለሰጢን ኣረይ ሞት ወኣህኣሽ ጋብኣም ህለው። እብ ፍንቲት እት ሐልፈዩ ሰለሰ ሰነት፡ ምን ልውሕዶ ክልኦት መሰለሰ ምን ሽዑብ ቐዝ እብ ኣልሆሽ ዲብ ልትጀረስ ጸንሐ። እብ ዓመት እብ መላዩን ለልትዐለዎ ኣንስ ወኣጀኒት ለብኡቶም ውላድ-ፈለሰጢን መታክየት እዪ ራድኢት ሻፍገት ጋብኣም ህለው። እምበል እሊመ እትለን ለሐልፈዩ ሰኔታት ቅሩብ እብ ሰብብ ኣልሆሽ ዲብ ቐጣዕ ብዝሐ ኣረይ ዕጾ ለጉብኣው ኣጀኒት እብ ሰለሰ ዕጹፍ ከም ወሰከ ተቃረር ለኣፍህም።



ኣለት ቅጣዕ ቐዝ ዲብ ትኬለመት ኣለት ዲብ ትካሬ እቲ ወክድ ቲ መጅተማዕ ዓለም ፍንጌ እሰራኤል ወሐረከት ሐማስ ኣብጠሮት ዘብዎ ሻፍግ እግል ልግባእ ሊከ ለቀደመ። እብ ኣሳሰለ ዲብ ሐልፈት ሰነት እብ ዜረኖት ርኢሰ ኣሚርከ ዶናልድ ትራምፕ ፍንጌ ክልኤ ለጀህት ለትበጽሐ 20 ንቃዋ ለቡ ይማም ሰላም እግል ልትከቦቲ ትቀሰበው። ምናተ ፍዓልየት ናይለ እትፋቅያት እት ክልኤ ለወዲ ህጁማት እሰራኤል ዲብ ቅጣዕ ልተላሌ ህለ።

እብ ኣሳሰለ ተቃረር፡ ክእነ ዲብ እንቲ ሐረከት ሐማስ ሰልሐ እግል ትክሬ ልጅነት ሰላም ሊከ ትቀድም እት ህሌት። ሐማስ እብ ኣሳሰለ ዲብ ካልኣይት ደርበት ቅዱም ለህለ ሽሩጣት ክሉ ሰልሐ እግል ትክሬ ወትሰልም ልትጠለብ ምን ህለ። ዲብ እሰራኤል ህዩ እብ እንክሩ ምን ቅጣዕ ቐዝ ቅፈቲ

እንዲ ረፍዐ እግል ልፍገር። ወራት ብዝ ናይለ ቅጣዕ ህዩ እግል ተኣንብት ክምቲ ልጅነት ሰላም ተሐብር። እሰራኤል እብ ጀው ወምድር ህጁማት እግል ቲዲ ምን ተኣንብት ወሐር ሌጠ ሐድ 80 ምእታይት ምን መባኒ ናይለ ቅጣዕ ጨበል ረምዖ ገብኦ። እብሊ ለዲብ በሮርሐት ትበደለ መባኒ እብ ሐዲስ እግል ልትበኔ፡ ወለቅጣዕ ሕብረ እቅወዩ ለህለ ለተሃገገ ኣብያት ኣንደፎት “ኣውለውየት ለልትህዩብ” ሽቅል ዲብ ልትበህልቲ ልትህደግ ዐለ። ምናተ እሊ ክሉ ሐማስ ሰልሐ ክምስል ከፊት ሌጣቲ እግል



ልግባእ ለቀድር ። መሐልሰት ስያሰት ክመ ልቡሉ፡ ሐማስ ለእትፋቅየት እት ፍዕል እግል ተኣውዕለ እትለን ኣሌላት እብ ልጅነት ሰኣል ዲብ ትቀደመ



ሐማስ ሰልሐ ትክሬ ገብኦ፤

እት ኢነት፡ ሰልሐ እግል ትክሬ እትፍቅት ክም ህሌት እብ ገበይ ኦሮት ውቁል በዐል ሰልጠተ እትእምርት ህሌት። እብ ክሱስ እሊ ዲብ መጽኢ ኣምዒላት ሽርሕ ረሰሚ እግል ተህብ ክምቲመ ሕብርት ህሌት። እሊ ክሉ ለትሽርሐ ዲብ ፍዕል ሐቆ ወዐለ፡ ኣለት ቅጣዕ ቐዝ ዲብ ሐል ዳይም እግል ለኣተጀህ መስኢት ህለ። ሰበቡ ህዩ እትሊ ወክድ እሊ 1.5 ሚልዮን ለገብኦ ውላድ-ፈለሰጢን ዲብ ናይ ዶሉ መሳክብ ኣክይ-መንበረት ለኣልፎ ህለው። ሐማስ ሰልሐ ሐቆ ከፊት እሰራኤል ምን ቐጣዕ ዲብ ሐቆ ኢሰሐበት ላኪን ለደግሽ ገበይ ብዕደት እግል ልጽብዋ ክም ቀድር ወግም ህለ።

እሊ ክእነ ዲብ እንቲ፡ ሰነን ግንራራብ ምውዳቅ ጽሓይ ላቶም ውላድ-ፈለሰጢን ዲብ ደማን ለኣለበ ኣለት ኣምን ክም ህለው ልትሽራሕ ህለ። ለሰብብ ህዩ፡ ዲብ ኣካን ኣድራም ለህለው ውላድ እሰራኤል ህጁማት ትሉሉይ ወዱ እቶም ህለው። ምን ወርሕ ጃንዋሪ ሰነት 2025 ኣሰክ ኣዜ፡ ዲብ ፈለሰጢን ሰነን ግንራራብ ምውዳቅ ጽሓይ ዝያድ 3000 ኢነት ህጁማት ጃሪ ህለ። እበ ህጁማት ህዩ፡ እትሊ ለሐልፈ ናይ ዝያድ ሰነት ወሰር ወቅት ሐድ 1670 ፈለሰጢኒ ቅቲላም ህለው።

እሰራኤል፡ ግንራራብ ምውዳቅ ጽሓይ እብ ተማመ ሐን መራቀብተ እግል ተኣትዩቲ ለትሐዜ። ዲብ ባክ ለነብሮ ውላድ-ፈለሰጢን ለቲለል እንዲ መረ እቶም ከሰኣየት እንዲ በተከው እግል ልግዐዞ ማሎም ትዘምት ወጀራይም ትወዲ እቶም ከም ህሌት ተቃረር ለኣፍህም። ኡርዱም ምን ሰነት 1949 ኣሰክ 1967 ግንራራብ ምውዳቅ ጽሓይ ጸብጠት ዲብ ዐለት እቲ ወክድ፡ ምድር ናይለ ባካት ናይ ኣፍራድ ኣው ናይ ሕኩመት እንዲ ትበህለ ልትሰጀል ዐለ። እብ ኣሳሰ ህዩ ክሎም ለኣርድ ዐለ እግሎም ውላድ-ፈለሰጢን ውራቅ ምልክየት ቃኑንየት ናይ ኣርድ



ዐለት እግሎም። ምናተ እትሊ ኣዜ ለህሌናሁ ወክድ፡ ኦሮት መሰለሰ ናይ ሽዑብ ፈለሰጢን ቲ ወሳይቅ ምልክየት ኣርድ ለቡ። ለበዝሐ ምን እትሊ ባካት ጸብጠው ለህለው ኣርድ ናዮም ክምቲ ለተኣክድ ወረቀት ምልክየት ቃኑንየት ኣለቦም። ኣግደ ሰብብ ናይ እሊ ህዩ መብዝሐም ሰነን ግንራራብ ምውዳቅ ጽሓይ እብ ሰብብ ዲብ ሰነት 1967 ለዐለ እብ ሐርብ ሰለ ኣምዕል ለልትኣመር ሐርብ እሰራኤል ወድወል ዐራብ ለናይ ምልክየት ውራቅም ሰበት በዳቲ።

እሰራኤል ሐፊ ግንራራብ ምውዳቅ ጽሓይ ከም ጸብጠቲ፡ ለፈለሰጢን ትወድዩ ዐለት ተሰጀል ኣራዲ ኣብጠረቲ። እትሊ ወክድ ህዩ 60 ምእታይት ምን ምድር ግንራራብ ምውዳቅ ጽሓይ ሐን መራቀብት እሰራኤል ህለ። እምበል እሊመ እሊ ኣዜ እብ ሐዲስ ተሰጀል ኣራዲ ለኣነብት እቲ ለህለ ድዋራት ግንራራብ ምውዳቅ ጽሓይ ፋይሕ፡ ኣብያት ሰከን ናይ ሐድ 300 ኣልፍ ፈለሰጢኒ ቲ።

እብ ኣሳሰለ እት ሰነት 1993 ወሰነት 1995 ፍንጌ እሰራኤል ወፈለሰጢን እበ ገብኣት እትፋቅየት ‘ኣሰሉ’፡ ግንራራብ ምውዳቅ ጽሓይ ዲብ 3 ክፋል ትካፈለ። ሰልሊቲ ህዩ ‘ኤ’፡። ‘ሲ’፡ እንዲ ትበህለ ትሰመ። ለእብ ‘ኤ’ ልትኣመር፡ እብ ፈለሰጢን

እግል ልትመቃረሕ፡ ለእብ ‘ቢ’ ለልትኣመር ሰሩ ሐን እዳረት ፈለሰጢን፡ ለተርፈ ህዩ ዲብ ሐን እሰራኤል እግል ልትመቃረሕ ድዋራት ‘ሲ’ ህዩ ክሉ ዲብ ሐን እዳረት እሰራኤል ከም ጸንሕ ገብኦ። ምናተ፡ ለቀራር 5 ሰነት ሌጠ እግል ልጽናሕ፡ ሐቆሁ ህዩ ዲብ ሐን እዳረት ፈለሰጢን እግል ልትመራሕ ዐለ ለውፋቅ። ምናተ ለዲብ ሐን እሰራኤል ለህለ ምድር ዲብ ፈለሰጢን እግል ልትዐዲ ቃድር ኢህለ።

ግንራራብ ምውዳቅ ጽሓይ፡ እብ ዓመት መስከብ ሐድ 3.3 ሚልዮን ፈለሰጢኒ ቲ። እት ረኣሰ እሊ ሐድ 700 ኣልፍ ውላድ-እሰራኤልም ነብሮ እቲ። እትሊ ለሐልፈነ ሰነን ቅሩብ፡ እሰራኤል ምድር ናይለ እትሊ ባካት ለነብሮ ፈለሰጢን እብ ሐለት ትነሰእ ዐለት። እምበል እሊመ ዲብ ድዋራት ለህለዩ ደገጊት ፈለሰጢን እንዲ ወረት፡ ዲብ ትሰጀን ወተዐዝብ ወኣብያት ዲብ ትደምር ጸንሐት ቲ። እበ ህጁማት ለፈርህው ሐድ 44 ኣልፍ ፈለሰጢኒ እትለን ለሐልፈዮን ሰኔታት፡ ምን ባካት እግል ልግዐዞ ትቀሰበው። እምበል እሊመ ብዝሓም ምን እሎም ፈለሰጢን እደይ ሞት ወምስክን ገብኣው። እብ ኣሳሰ ተቃረር መዝመት መጅልስ ቅራን፡ እትለን ፍንጌ እሰራኤል ወሐረከት ሐማስ ደግሸ ለገብኦ እትን ሰለሰ ሰነት፡ 1054 ውላድ-ፈለሰጢን ዲብ ግንራራብ ምውዳቅ ጽሓይ ትቀተለው።

እሰራኤል ዲብ ቅጣዕ ቐዝ ትወድዩ እበ ዐለት ወኣሰክ እለ ተኣተላልዩ ለህሌት ኣንሰ ወጀኒትመ ለኣልምሕክ ለክፍ፡ ኣሰክ እለ ምን ልውሕዶ 71,369 ፈለሰጢኒ ልትቀተሎ እት ህለው፡ ዝያድ 171,800 ትጃርሐው። እብ ኣሳሰ ተቃረር ውዛረት ዓፍየት ቅጣዕ ቐዝ እብ ሰብብ ለክፍ ዲብ ቅጣዕ ለጀሬት ከሳር እቅትሳድመ እብ ዓላብ ዶል ትትርኤ ኣሰክ 57.9 ቢልዮን ዶላር ከም ትትዋገም ሰብ መቅደረት ለሐብሮ።